

權載之文集

關化圖書館

Kaishua library

開化圖書館

Kaishua library

開化圖書館

Kaichua library

開化圖書館

Kaishua library

權載之文集卷第六

唐權德輿載之

雜詩

早夏青龍寺致齋憑眺感物因書十四韻

寺壁有舅
氏庶子詩

曉出文昌宮憇茲青蓮宇
潔齋奉明祀憑覽傷負古
秦爲三月火漢乃一坏土
詐力自湮淪霸儀終莽鹵
中南橫峻極積翠洩雲雨
首夏諒清和芳陰接場圃
仁祠闕巖淨稽首洗靈府
虛室僧正禪危梁鸞初乳
通莊走聲利結駟乃旁午
觀化復何如剗心信爲愈
盛時忽過量

弱質本無取靜永環中樞益愧腰下組塵勞期抖擻陟
降聊俯僂遺韻留壁間淒然感東武

仲秋朝拜昭陵

清秋壽原上詔拜承吉卜嘗讀貞觀書及茲幸齋沐文
皇昔潛躍隋季自顛覆撫運斯順人救焚非逐鹿神祇
戴元聖君父納大麓良將授兵符直臣調鼎餼無疆傳
慶祚有截荷亭育仙馭凌紫氛神遊奔黃屋方祇護山
跡先正陪巖腹杳杳九巖深沉沉萬靈肅鳥飛田已闢
龍去雲猶簇金氣爽林巒乾岡走崖谷吾皇宏孝理率
土蒙景福擁佑乃清夷威靈諒回復禮承三公重心愧

二卿祿展敬何所伸曾以斧山木

拜昭陵出城與張秘監閣老同里臨行別承在

史館未歸尋辱清辭輒酬之

仲月當南呂晨裝拜穀林逢君在東觀不得話離襟策
馬緣雲路開緘扣玉音還期纔浹日里社酒同斟

酬馮監拜昭陵迴途中遇雨見示

之子共乘輶清秋拜上霄

寢宮有上霄門

曙霞迎風駕零雨濕

迴鑣甘谷行初盡軒臺去漸遙望中猶可辨耘鳥下山

椒

朔旦冬至攝職南郊因書卽事

大明南至慶天正朔旦圓丘樂六成文軌盡同堯歷象
齋祠忝備漢公卿星辰列位祥光滿金石交音曉奏清
更有觀臺稱賀處黃雲捧日瑞昇平

奉和張監閣老過八陵院題贈杜卿崔員外

崇飾山園孝理深萬方同感聖人心已聞東閣招從事
每向西垣奉德音公府從容談婉婉賓階清切景沉沉
與君跬步如同舍終日相期此盍簪

奉和鄭賓客相公攝官豐陵扈從之作

時充鹵簿使

五輅導靈輜千夫象繚垣行宮移曉漏綵仗下秋原莫
究希夷理空懷渙汗恩頤神方蹈道傳聖乃遵尊共祝

如山壽俄驚憑几言遐荒七月會盼嚮百靈奔豹尾從
風直鸞旗映日翻塗芻聯法從營騎肅旌門杳靄虞泉
夕淒清楚挽喧不堪程盡處嗚咽望文園

詹事府宿齋絕句

清齋四體泰白晝一室空摧頰有古樹騷屑多悲風

和王祭酒太社宿齋不得赴李尚書宅會戲書

見寄

元禮門前勞引望勾龍壇下阻歡娛此時對局空相憶
博進何人更樂輸

酬裴端公八月十五日夜對月見懷

涼夜清秋半空庭皓月圓動搖隨積水皎潔滿晴天多
病嘉期阻深情麗曲傳偏懷賞心處同望庾樓前

奉和崔閣老清明日候許閣老交直之際辱裴

閣老書招云與考功苗曹長先城南遊覽獨

行口號因以簡贈

時德輿以疾故有阻追遊

紫禁宿初迴清明花亂開相招直城外遠遠上春臺諫
曹將列宿幾處期子玉深竹與清泉家家桃李鮮折芳
行載酒勝賞隨君有愁疾自無悰臨風一搔首

和張秘監閣老獻歲過蔣大拾遺因呈兩省諸

公並見示

二賢同載筆，久次入新年。
焚草淹輕秩，藏書厭舊編。
竹風晴翠動，松雪瑞光鮮。
慶賜行春令，從茲佇九遷。

酬崔舍人閣老冬至日宿直省中奉簡兩掖閣

老並見示

令節一陽新，西垣宿近臣。
曉光連鳳沼，殘漏近鷄人。
白

雪飛成曲黃，鍾律應均層。
霄翔迅羽廣，陌駐歸輪清。
切

晨趨貴恩華，夜直頻輟才。
時所重九月中楊閣老分命

秩皆真十月中崔閣老正拜本官德輿正左掖期連茹

南宮愧積薪，九年叨此地。
迴首倍相親

八月十五日夜瑤臺寺對月絕句

羸女乘鸞已上天仁祠空在鼎湖邊涼風遙夜清秋半

一望金波照粉田

仁祠寺也見後漢書楚王英傳

夏至日作

璿樞無停運四序相錯行寄言赫羲景今日一陰生

二月二十七日社兼春分端居有懷簡所思者

清晝開簾坐風光處處生看花詩思發對酒客愁輕社
日雙飛鷺春分百轉鷺所思終不見還是一含情

甲子歲元日呈鄭侍御明府

萬里煙塵合秦吳遂眇然無人來上國灑淚向新年世
故看風葉生涯寄海田屠蕪聊一醉猶賴主人賢

七夕

佳期人不見天上喜新秋玉佩霑清露香車渡淺流東
西一水隔迢遞兩年愁別有穿針處微明月映樓

嘉興九日寄丹陽親故

窮年路歧客西望思茫茫積水曾南渡浮雲失舊鄉海
邊尋別墅愁裏見重陽草露荷衣冷山風菊酒香獨謠
看墜葉遠目遍秋光更羨登攀處煙花滿練塘

九日北樓宴集

蕭颯秋聲樓上聞霜風漠漠起陰雲不見攜觴王太守
空思落帽孟參軍風吟蟋蟀寒偏急酒泛茱萸晚易醺

心憶舊山何日見併將愁淚共紛紛

奉陪李大夫九日龍沙宴會

遲字

龍沙重九會千騎駐旌旗水木秋光淨絲桐雅奏遲煙
蕪斂暝色霜菊發寒姿今日從公醉全勝落帽時

臘日龍沙會絕句

簾外寒江千里色林中罇酒七人期寧知臘日龍沙會
却勝重陽落帽時

嚴陵釣臺下作

絕頂聳蒼翠清湍石磷磷先生晦其中天子不得臣心
靈棲顛氣纓冕猶緇塵不樂禁中卧却歸江上春潛驅

東漢風日使薄者醇焉用佐天子持此報故人則知大
賢心不獨私其身弛張有深致耕釣陶天真奈何清風
後擾擾論屈伸交情同市道利欲相紛綸我行訪遺臺
仰古懷逸民增繳鴻鵠遠雪霜松桂新江流去不窮山
色凌秋晏人世自今古情輝照無垠

曉發武陽館卽事書情

清晨策羸車嘲晰聞村鷄行將騎吏親日與情愛睽東
風變林樾南畝事耕犁青菰冒白水方塘接廣畦雜英
被長坂野草蔓幽蹊烏鹵成坂壤枯株發柔莢芳樹鶯
命鷓深林麇引麕杳杳途未極團團日已西哲士務纓

楊韋之文集卷六
弁鄙夫戀蓬蒿終當稅塵駕盍濯依春溪

豐城劔池驛感題

龍劔昔未發泥沙相晦藏向非張茂先孰辯斗牛光神
物不自達聖賢亦彷徨我行豐城野慷慨心內傷

奉使宜春夜渡新淦江陸路至黃蘗館路上遇

風雨作

草草理夜裝涉江又登陸望路殊未窮指期今已促傳
呼戒徒御振轡轉林麓陰雲擁崑端霖雨當山腹震雷
如在耳飛電來照目獸迹不敢窺馬蹄唯務速虔心若
齋禮濡體如沐浴萬竅相怒號百泉暗奔瀑危梁慮足

跌峻坂憂車覆問我何以然前日受微祿轉知人代事
纓組乃徽束向若家居時安枕春夢熟遵途稍已近候
吏來相續曉霽心始安林端見初旭

細柳驛

細柳肅軍令條侯信殊倫棘門乃兒戲從古多其人神
武今不殺介夫如縉紳息駕幸茲地懷哉竦精神

渭水

呂叟年八十皤然持釣釣意在靜天下豈唯食營邱師
臣有家法小白猶尊周日暮駐征策愛茲清渭流

宮人斜絕句

一路斜分古驛前
陰風切切晦秋煙
鉛華新舊共冥冥
日暮愁鴟飛野田

敷水驛

空見水名敷
秦樓昔事無
臨風駐征騎
聊復捋髭鬚

朝元閣

繚垣複道上
曾霄十月離宮萬國朝
胡馬忽來清蹕去
空餘臺殿照山椒

石甕寺

石甕寒泉勝寶井
汲人迴挂青絲綆
厨煙半逐白雲飛
當晝老僧來灌頂

盤豆驛

盤豆緣雲上古郵望思臺下使人愁江充得許太子死
日暮戾園風雨秋

晚渡楊子江却寄江南親故

反照滿寒流輕舟任搖漾支頤見千里煙景非一狀遠
岫有無中片帆風水上天清去鳥滅浦迥寒沙漲樹晚
疊秋風江空翻宿浪胷中千萬慮對此一清曠迴首碧
雲深佳人不可望

新安江路

深潭與淺灘萬轉出新安人遠禽魚淨山深水木寒嘯

起青蘋末吟矚白雲端卽事遂幽賞何必挂儒冠

月夜江行

扣舷不得寐浩露清衣襟彌傷孤舟夜遠結萬里心幽
興惜瑤草素懷寄鳴琴三奏月初上寂寞寒江深

江城夜泊寄所思

客程殊未極艤棹泊迴塘水宿知寒早愁眠覺夜長遠
鍾和暗杵曙月照晴霜此夕相思意搖搖不暫忘

陪包諫議湖墅路中舉帆

同用
山字

蕭蕭涼雨歇境物望中閑風際片帆去煙中獨鳥還斷
橋通遠浦野墅接秋山更喜陪清興樽前一解顏

富陽陸路

又入亂峯去遠程殊未歸煙蘿迷客路山果落征衣歛
石臨清淺晴雲出翠微漁潭明夜泊心憶謝元暉

石塘路有懷院中諸公

迴合千峯裏晴光似畫圖征車隨反照候吏映寒蕪石
瀨侵行逕溪雲拂路隅未酬知己分寧敢學潛夫

玉山嶺上作

悠悠驅疋馬征路上連崗晚翠深雲竇寒苔淨石梁荻
花偏似雪楓葉不禁霜愁見前程遠空郊下夕陽

舟行夜泊

蕭蕭落葉送殘秋寂寞寒波急
暝流今夜不知何處泊
斷猿晴月引孤舟

曉發桐廬

客路去漫漫桐溪上水灘扣船乘曉月
欹枕聽迴灘煙
重江楓濕沙平宿鷺寒閑吟試一望
疑在畫屏看

夜汎臨平湖有寄

素彩皓通津孤舟入清曠已愛隔簾看
還宜卷簾望隔
簾卷簾當此時惆悵思君君不知

次滕老莊

征途無旅館當晝喜逢君羸病仍留客
朝朝掃白雲

曉

曉風搖五兩殘月映石壁稍稍曙光開片帆在空碧

晝

孤舟漾暖景獨鷓下秋空安流日正晝淨綠天無風

晚

古樹夕陽盡空江暮靄收寂寞扣船坐獨生千里愁

夜

猿聲到枕上愁夢紛難理寂寂深夜寒清霜落秋水

宿嚴陵

身羈從事驅征傳江入新安泛暮濤今夜子陵灘下泊

自慙相去九牛毛

權載之文集卷第六

化國書館

Karhna library

權載之文集卷第七

唐權德輿字載之

雜詩

奉和韋諫議奉送水部家兄上後書情寄諸兄
弟仍通簡南宮親舊並呈兩省閣老院長

駟牡龍旂慶至今一門儒服耀華簪人望皆同照乘寶
家風不重滿籛金護衣直夜南宮靜焚草清時左掖深
何幸末班陪兩地陽春欲和意難任

奉和史館張閣老以許陳二閣長愛弟俱爲尙
書郎伯仲同時列在南北省會於左掖因而

有詠

伯仲盡時賢平輿與潁川桂枝嘗徧折棣萼更相鮮丹

地晨趨並黃扉夕拜聯豈如分侍從來就鳳池邊主客水部

二員東西對行二閣老併在左掖也時議以爲分就西垣則具美相類故戲書未韻

韋賓客宅與諸博士宴集

累抗乞身章湛恩比上庠賓筵徵稷嗣家法自扶陽簪

組歡言久琴壺雅興長陰嵐冒苔石輕籟韻風篁佩玉

三朝貴揮金百慮忘因知卧商維豈勝白雲鄉

酬張秘監閣老喜太常中書二閣老與德輿同

日遷官相代之作

時秘書監亦同日拜命

珠樹共飛棲分封受紫泥正名推五字貴仕仰三珪繼

組心知忝

德輿代太常爲禮部

腰章事頗齊蓬山有佳句喜氣在

新題

國子柳博士兼領太常博士輒申賀贈

博士本秦官求才帖職難臨風曲臺淨對月璧池寒講
學分陰重齋祠曉漏殘朝衣辨色處雙綬更宜看

過隱者湖上所居

蝸舍映平湖皤然一魯儒唯將酒作聖不厭谷名愚兵
法窺黃石天官辨白榆行看軟輪起未可號潛夫

從叔將軍宅薔薇花開太府韋卿有題壁長句

因以和作

環列從容蹀躞歸光風駘蕩發紅薇
鷺藏密葉宜新霽蝶遶低枝愛晚暉
艷色當軒迷舞袖繁香滿逕拂朝衣
名卿洞壑仍相近佳句新成和者稀

奉和許閣老霽後慈恩寺杏園看花同用花字

口號時德輿當直

杏林微雨霽灼灼滿瑤華左掖期先至
中園景未斜含毫歌白雪藉草醉流霞
獨限金閨籍支頤啜茗花

奉和陳閣老寒食初假當直從東省往集賢因

過史館看木瓜花寄張蔣二閣老

書漏沉沉倦瑣闈西垣東觀閱芳菲
繁花滿樹似留客應爲主人休澣歸

晚秋陪崔閣老張秘監閣老苗考功同遊昊天
觀時楊閣老新直未滿以詩見寄斐然酬和

有媿蕪音

方駕遊何許仙源去似歸縈迴留勝賞蕭灑出塵機
泛菊賢人至燒丹姹女飛步虛清曉籟隱机吸晨暉
竹逕琅玕合芝田沆瀣晞銀鈎三洞字瑤笥六銖衣
麗句翻紅葉佳期限紫微徒然一相望郢曲和應稀

春日同諸公過兵部王尙書林園

休沐君相近時容
曳履過花間留客久
臺上見春多松色明
金艾鶯聲雜玉珂
更逢新酒熟相與藉庭莎

與沈十九拾遺同遊棲霞寺上方夜於亮上人

院會宿二首

攝山標勝絕暇日諧想矚
縈紆松路深繚繞雲巖曲
重樓迴樹杪古像鑿山腹
人遠水木清地深蘭桂馥
層臺聳金碧絕頂摩淨綠
下界誠可悲南朝紛在目
焚香入古殿待月出深竹
稍覺天籟清自傷人世促
宗雷此相遇偃傲從所欲
清論松枝低閑吟茗花熟
一生如土梗萬應相桎梏
永願事潛師窮年此棲宿

偶來人境外心賞幸隨君古殿煙霞夕深山松桂薰巖
花點寒溜石磴掃春雲清淨諸天近誼塵下界分名僧
康寶月上客沈休文共宿車林夜清猿徹曙聞

棲霞寺雲居室

一逕縈紆至此窮山僧盥漱白雲中閑吟定後更何事
石上松枝常有風

天竺寺

香刹西天寺昔遊如夢中煙蘿迷俗駕猿狖應山童蕭
颯松陰靜欹危石棧通雲霞棲半壁丹紺照晴空世界
悲何已心期惜未同相看整歸騎花雨夕濛濛

題邵端公林亭

春光何處足
柱史有林堂
鸚鵡風初暖
花開日欲長
畎池通舊水
掃逕閱新芳
更置盈樽酒
時時醉楚狂

題隱者所居

一逕茅茨下
千峯麋鹿羣
鴻妻同懶逸
漁父每知聞
日暮鳥擇木
天陰山出雲
此心終不動
鼓腹向堯君

題崔山人草堂

竹逕茆堂接洞天
閑持麈尾漱春泉
世人車馬不知處
時有歸雲到枕前

徐孺亭馬上口號

并序

鍾陵東湖之南有亭亭中有二碑一則故曲江張公所
製徐徵君碣一則北海李公所製放生池碑噫夫二君
子久隨化往而二文之盛傳於天下貞元初余爲是邦
從事每將迎郊勞多經是間且以其尙賢好生皆醇仁
之旨也因歎不得與二賢同時論文變損益亭址圯壤
苔篆磷缺古風如在感舊依然而通燼在側平湖在下
波流轂擊日月無窮因於馬上口號絕句詩一首以寄
愀愴

湖上荒亭臨水開龜文篆字積莓苔曲江北海今何處
盡逐東流去不迴

哭劉四尙書

勒於碑陰

士友惜賢人天朝喪守臣才華推獨步聲氣幸相親
理析環中妙儒爲席上珍笑言成月旦風韻挹天真
丹地膺推擇青油寄撫循豈言朝象魏翻是卧漳濱
命賜龍泉重追榮密印陳撤絃驚物故庀具見家貧
牢落風悲笛汎瀾涕泣巾只嗟蒿里月非復柳營春
黃絹碑文在青松隧路新音容無處所歸作北邙塵

張工部至薄寒山下有書無由馳報轉車之至

倍切悲懷

書來遠自薄寒山繚繞洮河出古關今日難裁秣陵報

薤歌寥落柳車還

工部發引日屬傷足卧疾不遂執紼

子春傷足日况有寢門哀元伯歸全去無由白馬來笳
簫里巷咽龜筮墓田開片石潺湲淚含悲叙史才

從事淮南府過亡友楊校書舊廳感念愀然下一

有遂書

十韻

故人隨化往倏忽今六霜及我就拘限清風留此堂松
竹逾映蔚芝蘭白銷亡絕絃罷流水聞笛同山陽頰如
冰玉姿粲若鸞鳳章欲翥摧勁翮先秋落貞芳正平賦
鸚鵡文考頌靈光二子古不弔夫君今可傷黃墟既杳

杏元化亦茫茫豈必限宿草含悽灑衣裳

哭李晦羣崔季文二處士

華封昔祝堯貴壽多男子二賢無主後貧賤大壯齒未
成鴻鵠姿遽頓驂騮趾子淵將叔度自古不得已

觀葬者

塗芻隨晝哭數里至松門貴盡人間禮寧知逝者魂笳
簫出古陌煙雨閉寒原萬古皆如此傷心反不言

成南陽墓

枯葦沒古基駸蘚蔽豐碑向晚微風起如聞坐嘯時

周平西墓

英威今寂寞陳跡對崇邱壯志清風在荒墳白日愁窮
泉那復曉喬木不知秋歲歲寒塘側無人水自流

蘓小小墓

萬古荒墳在悠然我獨尋寂寥紅粉盡冥冥黃泉深蔓
草映寒水空郊暖夕陰風流有佳句吟眺一傷心

題柳郎中茅山故居

一作柳谷
汧故居

下馬荒堦日欲曛潺潺石溜靜中聞鳥啼花落人聲絕
寂寞山窓掩白雲

哭張十八校書

數日前辱書未及
還答俄承凶訃

芸閣爲郎一命初桐州寄傲十年餘魂隨逝水歸何處

名在新詩衆不如蹉跎江浦生華髮牢落寒原會素車
更憶八行前日到含悽爲報秣陵書

題亡友江畔舊居

寥落留三徑柴扉對楚江
蟪蛄集暗壁蜥蜴走寒窓
松蓋欹書幌苔衣上酒缸
平生斷金契到此淚成雙

權載之文集卷第七

權載之文集卷第八

唐權德輿字載之

挽詞歌詩

德宗神武孝文皇帝挽詞歌

覆露雍熙運澄清教化源賡歌凝庶績羽舞被深恩纂
業光文祖貽謀屬孝孫恭聞留末命猶是愛元元
梯航來萬國玉帛慶三朝湛露恩方浹薰風曲正調晏
車悲鹵簿廣樂遏簫韶最愴號弓處龍髯上紫霄
常時栢梁宴玉笋恩波遍今日穀林歸靈輶煙羽霏喬
山森羽衛渭水擁旌旂仙馭何由見耘田鳥自飛

順宗至德大安孝皇帝挽歌

三首時充
鹵簿使

十葉開昌運三辰麗德音薦功期瘞玉昭儉每捐金解
澤皇風遍虞泉白日沉仍聞起居注焚奏感人心
孝理本憂勤立功在嗇神睿圖傳上嗣壽酒比家人仙
馭三清遠行宮萬象新小臣司吉從還扈屬車塵
候曉傳清蹕共瞻宮輅出迎風引綵旒遙想望陵愁弓
劍隨雲氣衣冠奉月游空餘駕龍處搖落鼎湖秋

昭德皇后挽歌詞

淮水源流遠塗山禮命升往年求故劍今夕祔初陵鸞
鏡金波澁翬衣玉彩凝千年子孫慶孝理在蒸蒸

大行皇太后挽歌詞 三首王氏

筮水靈源濬因山祔禮崇從龍開隧路合璧向方中帳
殿金根出廡衣玉座空唯餘文母化陰德滿公宮
配禮歸清廟靈儀出直城九虞寧厚載壹惠易尊名曉
漏銅壺澁秋風羽翬輕容車攀望處孺慕切皇情
哀笳出長信嗚咽宮車進寶劍入延津淒涼祠殿新青
烏靈兆久白鷺瑞書頻從此山園夕金波照玉塵

惠昭皇太子挽歌詞 二首

前星落慶霄薤露逐晨飈宮仗黃麾出仙遊紫府遙空
嗟鳳吹去無復鷄鳴朝今夜西園月重輪更寂寥

東朝聞楚挽羽翽依侷轉天歸京兆新日與長安遠蘭
芳落故殿桂影銷空苑騎吹咽不前風悲九旗卷

贈文敬太子挽歌詞 二首

盤石公封重瑤山贈禮尊歸全榮備物樂善積深恩鴈
沼寒波咽鸞旌夕吹翻唯餘西靡樹千古灞陵原

銅壺曉漏初羽翽擁塗車方外留鴻寶人間得善書清
笳悲畫綬朱邸散長裾還似緱山駕飄飄向碧虛

贈鄭國莊穆公主挽歌 二首

追飾崇湯沐遺芳藹禁闈秋原森羽衛夜壑掩容輝睿
藻悲難盡公宮望不歸笳簫向煙霧疑是綵鸞飛

舊館閉平陽容車啟壽堂霜凝薜英落風度薤歌長淑
德圖書在皇慈禮命彰悽涼霸川曲壟樹已成行

贈魏國憲穆公主挽歌詞 二首

漢制榮車服周詩美肅雍禮尊同姓主恩錫大名封外
館留圖史陰堂閉德容睿詞悲薤露千古仰芳蹤

秦樓曉月殘鹵簿列材官紅綬蘭桂歇粉田風露寒凝
笳悲駟馬清鏡掩孤鸞愍冊徽音在都人雪涕看

贈梁國惠康公主挽歌詞 二首

外館嬪儀貴中叅睿渥深初筭橫白玉盛服鏤黃金風
度簫聲遠河低婺彩沉夜臺留冊謚悽愴卽徽音

杏靄異湘川飄飄駕紫煙鳳棲人已去鸞鏡月空懸霧
濕湯沐地霜凝脂粉田音容無處所應在玉皇前

故太尉兼中書令贈太師西平王挽歌詞

翊戴推元老謀猷合大君河山封故地金石表新墳劔
履悲長夜笳簫咽暮雲還經誓師處薤露不堪聞

故司徒兼侍中贈太傅北平郡王挽歌詞

授律勲庸盛居中鼎鼐和佐時調四氣宣力靜三河忽
訪天京兆空傳漢伏波今朝麟閣上偏軫聖情多

奉和禮部李尚書酬楊著作竹亭歌

直城朱戶相邈連九逵舟轂聲闐闐春官自有花源賞

終日南山當目前晨搖玉珮趨溫室暮入竹溪疑洞天
煙消雨過看不足晴翠鮮飈逗深谷獨謠一曲泛流霞
閑對千竿連淨綠縈迴疏鑿隨勝地石磴巖扉光景異
虛齋寂寂清籟吟幽澗紛紛雜英墜家承麟趾貴劔有
龍泉賜上奉明時事無事人間方外興偏多能以簪纓
狎薜蘿嘗通內學青蓮偈更奏新聲白雪歌風入松雲
歸棟鴻飛滅處猶日送蝶舞閑時忽成夢蘭臺有客叙
交情返照中林曳履聲直爲君恩催造膝東方辨色謁
承明

奉和張僕射朝天行

元侯重寄貞師律三郡四封今靜謐丹轂常思闕下來
紫泥忽自天中出軍裝喜氣倍趨程千騎鳴珂入鳳城
周王致理稱申甫今日賢臣見明主拜恩稽首紛無已
凝旒前席皇情喜逢時自是山出雲獻可還同石投水
昔歲褒衣梁甫吟當時已有致君心專城一鼓妖氛靜
擁旆十年天澤深日日披誠奉昌運王人織路傳清問
仙醞嘗分玉笋濃御閑更輟金羈駿元正前殿朝君臣
一人負宸百福新宮懸綵仗儼然合瑞氣爐煙相與春
萬年枝上東風早珮玉晨趨光景好塗山已見首諸侯
麟閣終當畫元老溫室沉沉漏刻移退朝賓侶每相隨

雄詞樂職波濤濶曠度交歡雲霧披自古全才貴文武
懦夫只解冠章甫見公抽匣百鍊光試欲磨鋌諒無取
和李中丞慈恩寺清上人院牡丹花歌

澹蕩韶光三月中牡丹偏自占春風時過寶地尋香徑
已見新花出故藜曲水亭西杏園北濃芳深院紅霞色
擢秀全勝珠樹林結根幸在青蓮域艷藥鮮房次第開
含煙洗露照蒼苔龍肩倚杖禪僧起輕翅縈枝舞蝶來
獨坐南臺時共美閑行古刹情何已花間一曲奏陽春
應爲芬芳比君子

錫杖歌送明楚上人歸佛川

上人遠自西天至頭陀行遍南朝寺口翻貝葉古字經
手持金策聲泠泠護法護身唯振錫石瀨雲溪深寂寂
乍來松徑風更寒遙映霜天月成魄後夜空山禪誦時
寥寥挂在枯樹枝真法當傳心不住東西南北隨緣路
佛川此去何時迴應真莫便遊天台

馬秀才草書歌

大垣馬
正之子

伯英草聖稱絕倫後來學者無其人白眉年少未弱冠
落紙紛紛運纖腕初聞之子十歲餘當時時輩皆不如
猶輕昔日墨池學未許前賢團扇書艷彩芳姿相點綴
水映荷花風轉蕙三春併向指下生萬象爭分筆端勢

有時當暑如清秋蒲堂風雨寒颼颼乍疑崩崖瀑水落
又見古木飢颺愁變化縱橫出新意眼看一字千金貴
憶昔謝安問獻之時人雖見那得知

離合詩贈張監閣老

一作以離合詩
贈秘書監張薦

黃葉從風散共嗟時節換忽見鬢邊霜勿辭林下觴躬
行君子道身負芳名早帳殿漢官儀巾車塞垣草交情
劇斷金文律每招尋始知蓬山下如見古人心

思張公

奉酬禮部閣老轉韻離合見贈

秘書監張薦

移居既同里多幸陪君子宏雅重當朝弓旌早見招植
根瓊林圃直夜金闈步勸深子玉銘力競相如賦間濶

向春闈日復想光儀格言信難繼木石強爲詞私權閣

禮部權侍郎閣老史館張秘監閣老有離合酬

贈之什宿直吟翫聊繼此章 中書舍人崔

汾

脉脉羨佳期月夜吟麗詞諫垣則隨步東觀方承顧雪
林消艷陽簡冊漏華光坐更芝蘭室千載各芬芳節苦
文俱盛卽時仍並命翩翩紫宵中羽翮相輝映詠篇

同前 中書舍人楊於陵

校德盡珪璋才臣時所揚放情寄文律方茂經邦術王
猷偕發揮十載契心期晝遊有嘉話書法無隱辭信茲

酬和美言與芝蘭比昨來念吟繹日覺祛蒙鄙效三作

同前 給事中許孟容

史才司秘府文哲今超古亦有擅風騷六聯文墨曹左
賢三代意工藝千金字花識從臣謠人推仙閣吏如登
崑閬時口誦靈真詞孫簡下威鳳系霜瓊玉枝好

同前 給事中馮伉

車馬退朝後申懷在文友動詞宗伯雄重美良史功亦
曾吟鮑謝二妙尤增價雨子付反霜鴻戾天而樹烏啼夜

單思各縱橫早擅希代名息心欲焚硯自醜陪羣英罪惡

同前 戶部侍郎潘孟陽

詠歌有離合永夜觀酬答筍中操綵牋竹簡何足編意
深俱妙絕心契交情結計彼官接聯言初並清切翔集
本相隨羽儀良在斯烟雲競文藻因喜翫新詩

詞章美

同前 國子司業武少儀

少年慕時彥小悟文多變木鐸比羣英八方流德聲雷

陳美交契雨雪音陳繼恩顧各飛翔因詩覩瑰麗傳野

絕遺賢人希有盛遷早欽風與雅日詠贈酬篇

才思博

春日雪寄上張二十九丈大監請招禮部權曹

長迴文絕句 戶部侍郎潘孟陽

春梅雜落雪發樹幾花開真須盡興飲仁里願同來

奉酬 秘書監張薦

遲遲日氣暖漫漫雪天春知君欲醉飲思見此交親

酬前

酒杯春醉好飛雪晚庭閑久意同前賞中林對遠山

五雜組

五雜組旗亭客往復還城南陌不得已天涯謫

數名詩

一區揚雄宅恬然無所欲二頃季子田歲晏常自足三
端固爲累事物反徽束四體苟不勤安得豐菽粟五侯
誠曄曄榮甚或爲辱六翮未騫翔虞羅乃相觸七人稱

作者杳杳有遐躅八桂挺竒姿森森照初旭九歌傷澤
畔怨思徒刺促十翼有格言幽貞謝浮俗

星名詩

虛懷何所欲歲晏聊懶逸雲翼謝翩翩松心保貞實風
秋景氣爽葉落井逕出陶然美酒酣所謂幽人吉自當
輕尺璧豈復掃一室安用簪進賢少微斯可必

卦名詩

節變忽驚春臨風騁望頻支頤倦書幌步履整正巾時
鳥漸成曲雜芳隨意新曙霞連觀闕綺陌麗咸秦天地
今交泰雲雷昔邁屯中孚諒可樂書此示家人

藥名詩

七澤蘭芳千里春
瀟湘花落石磷磷
有時浪白微風起
坐釣藤陰不見人

古人名詩

藩宣秉戎寄
衡石崇勢位
年紀信不留
弛張良自媿
樵蘇則爲愜
瓜李世可畏
不顧榮官尊
每陳豐畝利
家林類巖嶽
負郭躬斂積
息滿寵生嫌
養蒙恬勝智
疎鍾皓月曉
晚景丹霞異
澗谷永不諼
山梁冀無累
頗符生肇學
得展禽尙志
從此直不疑
支離疎世事

州名詩寄道士

林華之文集卷八
九
金蘭同道義瓊簡復芝田平楚白雲合幽崖丹桂連松
峯明愛景石竇納新泉冀永南山壽歡隨萬福延

八音詩

金谷盛繁華涼臺列簪組石崇留客醉綠珠當座舞絲
淚可銷骨冶容竟何補竹林諒賢人滿酌無所苦匏居
容宴豆儒室貴環堵土鼓與汙尊頤神則爲愈革道當
在早謙光斯可取木鴈才不才吾知養生主

建除詩

建節出王都雄雄大丈夫除書加右職騎吏擁前驅滿
月張繁弱含霜耀鹿盧平明躍騾裏清夜擊珊瑚定遠

功那比平津業乃迂執心思報國効節在忘軀破膽銷
丹浦嘖蛾舞綠珠危冠徒自愛長轂事應殊成績封千
室疇勞使五符收功輕驃衛致理邁黃虞開濟今如此
英威古不侔閉關草立者無乃誤爲儒

六府詩

金罍映玉俎賓友紛宴喜木蘭泛方塘桂酒啟皓齒水
榭臨空迥酣歌當座起火雲散奇峯瑤瑟韻清徵土梗
乃虛論康莊有逸軌穀城一編書談笑佐天子

三婦詩

大婦刺繡文中婦縫羅裙小婦無所作嬌歌遏行雲丈

人且安座金爐香正薰

安語

巖巖五岳鎮方輿八極廓清氛禳除揮金得謝歸里閣
象床角枕支體舒

危語

被病獨行逢乳虎狂風駭浪失棹檣舉人看榜聞曉鼓
孱夫孽子遇妬母

大言

華嵩爲珮河爲帶南交北朔跬步內搏鵬作腊巨鼈鱗
伸舒軼出元氣外

小言

醯雞伺晨駕蚊翼毫端棘刺分吟域蛛絲結構聊廕息
蟻垤崔嵬不可陟

權載之文集卷第八

權載之文集卷第八

華化圖書館

Wahua library

權載之文集卷第九

二

權載之文集卷第九

唐權德輿字載之

雜詩歌曲

雜詩五首

婉彼羸氏女吹簫偶簫史綵鸞駕非烟綽約兩僊子神
期諒交感相顧乃如此豈比成都人琴心中夜起

陽臺巫山上風雨忽清曠朝雲與遊龍變化千萬狀魂
交復目斷縹緲難比況蘭澤不可親凝情坐惆悵

淇水春正綠上宮蘭葉齊光風雨搖蕩鳴珮出中閨一
顧授橫波千金呈瓠犀徒然路傍子怳怳復淒淒

柳華之文集 卷九
一
碧樹泛鮮飈玉琴含妙曲佳人掩鸞鏡婉婉凝相矚文
袿映束素香黛宜曠睽寂寞遠懷春何時來比目
含顰倚瑤瑟丹慊結繁慮失身不自還萬恨隨玉筍
蕪下山路團扇秋風去君看心斷時猶在目成處

廣陵詩

廣陵實佳麗隨季此爲京八方稱輻奏五達如砥平大
旆映空色笳簫發連營層臺出重霄金碧摩顥清交馳
流水轂迴接浮雲薨青樓旭日暎綠野春風晴噴玉光
照地顰蛾價傾城燈前互巧笑陌上相逢迎飄飄翠羽
薄掩暎紅襦明蘭麝遠不散管絃閑自清曲士守文墨

達人隨性情茫茫竟同盡冉冉將何營且申今日歡莫務身後名肯學諸儒輩書窗誤一生

古意

家人強進酒酒後能忘情持杯未飲時衆感紛已盈明月照我房庭柯振秋聲空庭白露下枕席涼風生所思萬里餘水澗山縱橫佳期憑夢想未曉愁雞鳴願得一心人當年歡樂平長筵暎玉俎素手彈秦箏曠睇呈巧笑惠音激淒清此願良未果永懷空如醒

雜言和常州李員外副使春日戲題十首并序

序闕

柳車之文集卷九
二
隨風柳絮輕暎日杏花明無柰花深處流鶯三數聲蘭
橈畫舸轉花塘水暎風搖路漸香任與不知行近遠更
憐微月照鳴榔

簷前曉月驚雙鷺戶外春風無百花粉署可憐閑對此
唯令碧玉泛流霞

枕上覺窗外曉怯朝光驚曙鳥花墜露滿芳沼柳如絲
風裏裏佳期遠相見少試一望魂杳眇

閑庭無事獨步春輝韶光滿日落蕊盈衣芳樹交柯文
禽並飛婉彼君子悵然有違對酒不飲橫琴不揮不揮
者何知音誠稀

江春好遊衍處處芳菲積綵舫入花津香車依柳陌綠
楊烟裏裏紅蕊鶯寂寂如何愁思人獨與風光隔曙月
漸到窻前移樽更就芳筵輕吹乍搖蘭燭春光暗入花
鈿絲竹偏宜靜夜綺羅共占韶年不遣通宵盡醉定知
辜負風烟

露洗百花新簾開月照人綠窻銷暗燭蘭逕掃清塵雙
鶯頻驚夢三桃競報春相思寂不語珠淚灑紅巾
雨歇風輕一院香紅芳綠翠接東墻春衣試出當軒立
定被隣家暗斷腸

春風半春光遍柳如絲花似霰歸心勞夢寐遠目傷遊

眄可惜長安無限春年年空向江南見

相思曲

一作長相思

少小別潘郎嬌羞倚畫堂有時裁尺素無事約殘黃鵲
語臨粧鏡花飛落繡床相思不解說明月照空房

古樂府

光風澹蕩百花吐樓上朝朝學歌舞身年二八墜侍中
幼妹承恩兄尚主綠窻珠箔繡鴛鴦侍婢先焚百和香
鸞啼日出不知曙寂寂羅幃春夢長

渡秋江怨二首

秋江半秋月明孤舟獨夜萬里情萬里情相思遠人不

見兮淚滿眼

見兮淚滿眼

渡秋江兮渺然望秋月兮嬋娟色如練萬里遍我有所
思兮不得見不得見兮露寒水深耿遙夜兮傷心

秋閨月

三五二八光如練海上天涯應共見不知何處玉樓前
乍入深閨玳瑁筵露濃香溼和愁坐風動羅帷照獨眠
初卷珠簾看不足斜抱箜篌未成曲稍映粧臺臨綺窻
遙知不語淚雙雙此時愁望知何極萬里秋天同一色
靄靄遙分陌上光迢迢對此閨中憶早晚歸來歡讌同
可憐歌吹月明中此夜不堪腸斷絕願隨流影到遼東

薄命篇

一作妾
薄命篇

昔住邯鄲年尚少只是嬌羞弄花鳥青樓碧紗大道邊
綠楊日暮風裊裊嬋娟玉兒二八餘自憐顏色花不如
麗質全勝秦氏女藁砧寧用專城居歲去年來年漸長
青蛾紅粉全堪賞玉樓珠箔但閑居南陌東城詎來往
韶光日日看漸遲標梅旣落行有時寧知燕趙娉婷子
翻嫁幽并游俠兒年年結束青絲騎出門一去何時至
秋月空懸翡翠簾春幃嬾卧鴛鴦被沙塞經時不寄書
深閨愁獨意何如花前拭淚情無限月下調琴恨有餘
離別苦多相見少洞房愁夢何由曉閑看雙燕淚霏霏

靜對空床魂悄悄鏡裏紅顏不自禁陌頭香騎動春心
爲問佳期早晚是人人忽解有黃金

放歌行

夕陽不駐東流急榮名貴在當年立青春虛度無所成
白首銜悲亦何及拂衣西笑出東山君臣道合俄頃間
一言一笑玉墀上變化生涯如等閑朱門杳杳列華戟
座中皆是王侯客鳴環動珮暗珊珊駿馬花驄白玉鞍
十千斟酒不知貴半醉留賓邀盡歡銀燭煌煌夜將久
侍婢金罍瀉春酒春酒盛來琥珀光暗聞蘭麝幾般香
乍看皓腕映羅袖微聽清歌發杏梁雙鬟美人君不見

一一皆勝趙飛燕迎杯乍舉石榴裙勻粉時交合歡扇
未央鍾漏醉中聞聯騎朝天曙色分雙闕烟雲遙靄靄
五衢車馬亂紛紛罷朝鳴珮驟歸鞍今日還同昨日歡
歲歲年年恣遊讌出門滿路光輝遍一身自樂何足言
九族爲榮真可羨男兒稱意須及時閉門下帷人不知
年光看逐轉蓬盡徒詠東山招隱詩

雜言○旅館雪晴又覩新月衆興所感因成雜
言

寥寥深夜雪初晴樓上雲開月漸明池中片影依稀見
簾外清光遠近生皎皎晴空疑破鏡廣庭積素偏相映

珠簾卷却光更深玉指持來色逾淨夢覺青樓最可憐
嬋娟素魄滿寒天天地寥寥同一色秦淮楚江無限極
歸鴻斷猿何處聲深閨旅館遙相憶長安五侯華閣開
嘉賓列座傾金罍賞明月翫流雪纖手蛾眉座中設清
歌一聲無斷絕夜已久樂未闌狐裘獸炭不知寒珠環
翠珮聲珊珊履舄紛紜桂袖攢朱顏倚醉盡君歡人生
少年全不久相看且勸杯中酒丈夫富貴自有期映雪
讀書徒白首

玉臺體十二首

鶯啼蘭已紅見出鳳城東粉汗宜斜日衣香逐上風情

來自不覺暗駐五花驄

嬋娟二八正嬌羞日暮相逢南陌頭試問佳期不肯道
落花深處指青樓

隱暎羅衫薄輕盈玉腕圓相逢不肯語微笑畫屏前
知向遼東去由來幾許愁破顏君莫怪嬌小不禁羞
樓上吹簫罷閨中刺繡闌佳期不可見盡日淚潺潺
淚盡珊瑚枕魂銷玳瑁床羅衣不忍著羞見繡鴛鴦
君去期花時花時君不至簷前雙鷺飛落妾相思淚
空閨滅燭後羅幌獨眠時淚盡腸欲斷心知人不知
秋風一夜至吹盡後庭花莫作經時別西隣是宋家

獨自披衣坐更深月露寒隔簾腸欲斷爭敢下堦看
昨夜裙帶解今朝蟻子飛鈿華不可棄莫是藁砧歸
萬里行人至深閨夜未眠雙眉燈下掃不待鏡臺前

贈友人

時友人新
有別恨者

知向巫山逢日暮輕鞋玉佩暫淹留曉隨雲雨歸何處
還是襄王夢覺愁

舟行見月

月入孤舟夜半晴寥寥霜鴈兩三聲洞房燭影在何處
欲寄相思夢不成

雜興五首

藜鬢愁眉時勢新初筭絕代北方人一顰一笑千金重
肯似成都夜失身

乍聽絲聲似竹聲又疑丹穴九雛驚金波露洗淨於晝
寂寞不堪深夜情

琥珀樽開月映簾調絃理曲指纖纖含羞斂態勸君住
更奏新聲刮骨鹽

乳鷺雙飛鶯亂啼百花如繡照深閨新妝對鏡知無比
微笑時時出瓠犀

巫山雲雨洛川神珠襪香膏穩稱身惆悵粧成君不見
含情起立問傍人

卷第九

權載之文集卷第十

唐權德輿字載之

雜詩

祇役江西路上以詩代書寄內

辛苦事行役風波倦晨暮搖搖結遐心靡靡卽長路別
來如昨日每見缺蟾兔潮信催客帆春光變江樹宦遊
豈云愜歸夢無復數愧非超曠姿循此跼促步笑言思
暇日規勸多遠度鶉服我久安荆釵君所慕伊予多昧
理初不涉世務適因臃腫材成此嬾慢趣一身常抱病
不復理章句胸中無町畦與物且多忤旣非大川楫則

守南山霧胡爲出處間徒使名利污羈孤望子祿孩穉
待我舖未能卽忘懷恨恨以此故終當稅鞵鞅豈待畢
婚娶如何久人寰俛仰學舉措衡茅去迢遰水陸兩馳
驚晰晰窺曉星塗塗踐朝露靜聞田鶴起遠見沙鶻聚
怪石不易躋急湍那可泝漁商聞遠岸烟火明古渡下
碇夜已深上碇波不駐畏途信非一離念紛難具枕席
有餘清壺觴無與晤南方出蘭桂歸日自分付北窻留
琴書無乃委童孺春江足魚鴈彼此勤尺素早晚到中
閨怡然兩相顧

夜泊有懷

樓鳥向前林暝色生寒蕪孤舟去不息衆感非一途川
程方浩淼離思紛鬱紆轉枕睡未熟擁衾淚已濡窘然
風水上寢食疲朝晡心想洞房夜知君還向隅

自桐廬如蘭溪有寄

東南江路舊知名惆悵春深又獨行新婦山頭雲半斂
女兒灘上月初明風前蕩颺雙飛蝶花裏間關百轉鶯
滿目歸心何處說欹眠搔首不勝情

相思樹

家遠江東道身對江西春空見相思樹不見相思人

石楠樹

石楠紅葉透簾春憶得粧成下錦茵試折一枝含萬恨
分明說向夢中人

斗子灘

斗子灘頭夜已深月華偏照此時心春江風水連天濶
歸夢悠揚何處尋

黃蘗館

駟車振楫越山川候曉通宵冒烟雨青楓浦上魂已銷
黃蘗館前心自苦

清明日次弋陽

自歎清明在遠鄉桐花覆水葛溪長家人定是持新火

點作孤燈照洞房

中書夜直寄贈

通籍在金閨懷君百慮迷迢迢五夜永脉脉兩心齊步
屐疲青瑣開緘倦紫泥不堪風雨夜轉枕憶鴻妻

病中寓直代書題寄

愚夫何所任多病感君深自謂青春壯寧知白髮侵寢
興勞善祝踈嬾愧良箴寂寞聞宮漏那堪直夜心

端午日禮部宿齋有衣服綵結之貺以詩還荅

良辰當五日偕老祝千年綵縷同心麗輕裙映體鮮寂
寥齋畫省欵曲擘香牋更想傳觴處孫孩遍目前

酬九日

重九共遊娛秋光景氣殊他時頭似雪還對插茱萸

和九日從楊氏姊遊

秋光風露天令節慶初筵易象家人吉闈門女士賢招
邀菊酒會屬和柳花篇今日同心賞全勝落帽年

上巳日貢院考雜文不遂赴九華觀袂襖之會

以二絕句申贈

三日韶光處處新九華仙洞七香輪老夫留滯何由往

珉玉相和正遶身

時以沽美玉爲詩題

袂飲尋春興有餘深情婉婉見雙魚同心齊體如身到

臨水煩君便袂除

和九華觀見懷真院八韻

上巳好風景仙家足芳菲地殊蘭亭會人似山陰歸丹
竈珠綴掩白雲巖逕微真官集女士虛室含春輝拘限
心杳杳歡言望依依滯茲文墨職坐與琴觴違麗曲滌
煩慮幽緘發清機支頤一吟想恨不雙翻飛

桃源篇

小年嘗讀桃源記忽覩良工施繪事巖逕初欣繚繞通
溪風轉覺芬芳異一路鮮雲雜彩霞漁舟遠遠逐桃花
漸入空濛迷鳥道寧知掩映有人家脰眉秀骨爭迎客

鑿井耕田人世隔不知漢代有衣冠猶說秦家變阡陌
石髓雲英甘且香仙翁留餘出青囊相逢自是松喬侶
良會應殊劉阮郎內子閑吟倚瑤瑟翫此沉沉銷永日
忽聞麗曲金玉聲便使老夫思閣筆

新月與兒女夜坐聽琴舉酒

泥泥露凝葉騷騷風入林以茲皓月圓不厭良夜深列
坐屏輕箏放懷絃素琴兒女各冠笄孫孩遶衣襟乃知
大隱趣宛若滄洲心方結偕老期豈憚華髮侵笑語向
蘭室風流傳玉音愧君袖中字價重雙南金

七夕

今夕雲輶渡鵲橋應非脉脉與迢迢家人競喜開粧鏡
月下穿鍼拜九霄

縣君赴興慶宮朝賀載之奉行冊禮因書卽事
合卺交歡二十年今朝比翼共朝天風傳漏刻香車度
日照旌旗綵仗鮮顧我華簪鳴玉珮看君盛服耀金鈿
相期偕老宜家處鶴髮魚軒更可憐

元和元年蒙恩封成紀縣伯時室中封安喜縣
君感慶兼懷聊申賀贈

啟土封成紀宜家縣安喜同欣并賦開共受閨門祉珩
璜聯采組琴瑟諧宮徵更待懸車時與君歡暮齒

河南崔尹卽安喜從兄宜于室家四十餘歲一
昨寓書病傳永寫告身旣枉善祝因成絕句
五色金光鸞鳳飛三川墨妙巧相輝尊崇善祝今如此
共待曾元捧翟衣

奉使豐陵職司鹵簿通宵涉路因寄內

綵仗列森森行宮夜漏深
及鉦方啟路鉦鼓正交音
曙月思蘭室前山辯穀林
家人念行役應見此時心

酬南園新亭宴會璩新第慰慶之作時任賓客
南亭烟景濃平視中南峯
官閑似休沐盡室來相從
日抱漢陰甕或成胡蝶夢
樹老欲連雲竹深疑入洞
歡言

交羽觴列坐儼成行歌吟不能去待此明月光好送蘊
明識內顧多慚色不厭梁鴻貧常譏伯宗直子壻信時
英諫垣金玉聲男兒纔弱冠射策幸成名偃放斯自足
翛然去營欲散木固無堪虛舟常任觸大隱本吾心喜
君流好音相期懸車歲此地卽中林

七夕見與諸孫題乞巧文

外孫爭乞巧內子共題文隱暎花匳對參差綺席分鵲
橋臨片月河鼓掩輕雲羨此嬰兒輩歡呼徹曙聞

太常寺宿齋有寄

轉枕排燈候曉雞想君應嘆太常妻長年多病偏相憶

柳華之文集卷十
不遣歸時醉似泥

朝迴閣樂寄絕句

子城風暖百花初樓上龜茲引導車曲罷卿卿理騶馭
細君相望意何如

中書宿齋有寄

銅壺漏滴斗闌干泛灩金波照露盤遙想洞房眠正熟
不堪深夜鳳池寒

中書送勅賜齋饌戲酬

常日每齊眉今朝共解頤遙知太官膳應與衆雛嬉
勅賜長壽酒因口號以贈

恩霑長壽酒歸遺同心人滿酌共君醉一杯千萬春

冬至日宿齋時郡君南內朝謁因寄

清齋獨向圓丘拜盛服想君與慶朝明日一陽生百福
不辭相望阻寒宵

發峽石路上却寄內

莎柵東行五谷深千峯萬壑雨沉沉細君幾日路經此
應見悲翁想望心

貞元七年蒙恩除太常博士自江東來朝時與
郡君同行西岳廟停車祝謁元和八年拜東
都留守途次祠下追計前事已二十三年于

茲矣時郡君以疾恙續發因代書却寄

憶昔辛未歲詔書下江壩盡室赴禮官脂車雜輜駟行

役過梁苑淹留經圃田

郡君表姊壻元俯為宣武從事
權理宋州郡君從壻李融時為

鄭州各淹
留累日

秦關信百二征駕逾三千仙掌眺蓮峯靈祠

謁金天騶馭儼已駐女巫爭來前動容既紛若展敬方

肅然

時為女竺所導過
於恭敬不能具舉

蹇步入國門華簪拱祥烟諫曹

迨居守倏已十六遷及茲東乘轅二十餘三年盛明受

恩澤清近皆聯翩忽當禮寺重俄忝相印懸陳力才不

任乞骸詞頗堅解龜罷金鼎賜劍猶龍泉鄙夫何所能

實賴中饋賢談笑皆體遠箴規諒才全拜恩理晨裝詔

使來駢闐風生鞍馬疾日出旌旗鮮信宿歷道途曩遊

記周旋慙別亦不易沉痾今未痊醫方驗桐君道術依

竺乾庶憑神明佑得使疾恙蠲醫工輔氏深於藥術診切大比丘尼優曇持念

精至並約同永懷心如惓引望脰已痛離披夏雲盡皎

鏡秋月圓開緘諷色絲撰日馳平肩延企勞夢寐涕洟

暗潺湲想君路經茲還復申祝延攝拜奠清醑相期保

華顛遠慙周君較聊擬顧彥先慇懃俟來報淚墨書此

篇

化

權載之文集卷第十

關化圖書館

Wathua library

權載之文集卷第十一

唐權德輿字載之

碑

大唐銀青光祿大夫檢校司徒同中書門下平
章事太清宮及度支諸道鹽鐵轉運等使崇
文館大學士上柱國岐國公杜公淮南遺愛
碑銘 并序

通天下之志者在大君元臣之感會而已成天下之務
者在知人安人之教化而已孝文御寓貞元十九年統
燭羣生德侔往初建用皇極澤流方國淮南節度觀察

使左僕射相國杜公政成入覲迺三月王子朔登拜司空秉鈞居中間一歲上皇承末命越八月皇帝受命神器弼亮三聖謨明九功當冢宰揔已之任護崇陵因山之制盡董經費以頒地貢乃作司徒式和人則進封岐土命賜備厚均齊天下之政茂遂萬物之宜尊道宏化匪躬宣力中外之重必歸於公初公之入輔也制詔副節度使兵部尚書王公爲左僕射代居師帥州壤鄉部鰥孤幼艾蒙公之化也久感公之惠也深鬱陶詠嘆願刻金石王公累章上請公輒牢讓中止至是復以邦人不可奪之誠達於聰明且用季孫行父請史克故事故

德輿得類其話言而鋪其馨香云公字君卿京兆杜陵
人不書名尊大臣也清明廉直溫毅宏重易簡之道本
於健順忠智之謀發爲事業慮善以動得時大行其初
筮仕州府交辟韋尙書元甫實爲已知始自掾吏累爲
命介盈庭鬪辨積歲疑留者片言以聽斷含冤自誣具
獄訟殺者覆視而全活江介吏師以爲神明由殿中侍
御史轉主客員外郎工部郎中再爲撫州刺史以御史
中丞領容州刺史經畧使入爲金部度支二郎中復兼
中丞超拜戶部侍郎出爲蘇州刺史屬受代者以憂闕
換饒州刺史明年以御史大夫領廣州刺史嶺南節度

觀察使徵爲尙書左丞復以御史大夫領陝州長史陝
虢都防禦觀察使歲在庚午以禮部尙書至於是邦禹
貢淮海之域職方東南之輿產金三品射利萬室控荆
衡以汭泛通夷越之貨賄四會五達此爲咽頤初公之
至也歲丁驕陽人有菜色於是息浮費以悅之蠲雜征
以利之夫家之稅有冒役者免其罪以購之廢居之豪
有委積者盈其直以出之瀕海弃地芟芻填游一夫之
勤百畝可獲終古遺利沛然嘉生成於指顧得以蕃殖
先是營部未葺困倉未完介夫半寓於仁祠公聚或委
於支郡公乃慮材用量事期輯中權規大壯百堵皆作

三軍寧宇轅門言言夏屋耽耽可以張射侯可以容宴
豆爰居爰處而武備脩矣巨廩崇構翬飛雲矗縮以板
榦積如京坻得蓋藏之宜協出入之制多黍多稌而禮
節行矣連營三十二積穀五十萬工以悅使人以樂成
又瀦雷陂以漑穡地醜引新渠匯於河流皆省工費而
宏利澤俄授左揆竟叅大政加徐泗豪等州節度使先
皇帝在宥天下推恩彭城顧懷舊勞復命其嗣使得以
州師建節而公以二郡進律惟公鎮定一方心平德和
言仁必及人言智必及事生聚教訓勤身急病視闔境
如棖闌之內撫編人有父母之愛因其習俗而均安之

識其慘舒而導利之仕六朝而推元老踰二紀而再掌
邦賦揚美化於方志流淑聲於命書其牧臨川也地叅
閩蠻人本輕惰化被游手敏於農功堅舊防而時其蓄
泄當大旱而我有雲雨每歲徵令歸諸有司克變輸將
之勤不虧公上之人因獲贏利悉賙困窮其愬司計也
權重輕以平物力受比要以均財征厚生而不匱量入
而有節當一人注意之重盡三接沃心之言宰司沮傷
不得久處其鎮南海也服嶺阻深族類猜害塗巷阨陋
爍埃接連忿懣相因鬱攸斯作公乃脩伍列闔康莊禮
俗以阜火災自息南金象齒航海貿遷悍將反覆遠夷

愁擾吏困沓貪商久阻絕公乃導其善利推以信誠萬
船繼至百貨錯出邕部絕徼商人自擅誘掖招徠以威
以懷朱涯黎氏保險三代種落繁互數犯吏禁公麾偏
師一舉而平獷俗率化原人得職其登左轄也紀律脩
明清萬事之本其理分陝也惠綏浹洽宏二南之化必
宿其業而脩其方崇庸大績其昭昭如是而又博極書
術詳觀古今謀王體斷國論其言有章聽者皆竦作爲
通典以究理道上下數千百年間損益討論而折中之
佐王之業盡在是矣公之先在漢則建平敬侯有立宣
之功在晉則當陽成侯決平吳之策忠力雋賢寔明而

昌以至曾祖諱行敏皇銀青光祿大夫荆益二大都督
府長史南陽郡公王父諱慤尚書右司員外郎麗正殿
學士烈考諱希望厯鴻臚卿御史中丞再爲恒州刺史
代鄯二州都督西河郡太守襄陽縣男贈尚書左僕射
惟南陽德化茂于列藩惟右司文雅重於中臺惟僕射
有文武器任克揚風績其督鄯州忽節制留府數與虜
确奮其威謀奪鹽泉吞河曲城便地置新軍剖符惠人
理行第一以先大夫代德丕烈之若是公能聿脩而宏
大之憑厚貽慶爲不誣矣居鎮十三年願修覲謁拜章
十上西向涕淚上難其繼慰勉而已公以述職在於庇

人納忠在於薦賢密疏請以王公爲代

人納忠在於薦賢密疏請以王公爲代詔爲之貳暨公
之至也由大司寇爲大司馬以副車戎裝伏謁和門禮
君渥命冠耀藩服介圭得請丹轂載馳勲籍禪校乞留
遮道初諭以溫顏終肅以軍法旣告令尹之政卒獲子
牟之心詩曰布政優優百祿是遒又曰神之聽之式穀
以汝則岐公永亨貽耄如崗如陵不待瞽史而前知矣
惟王公師長論道如公之位阜俗撫封如公之心且以
斯人嚮慕三歲愈甚大懼公之功德寤而不章初撫人
廣人皆鏤堅石以攄盛烈及茲而追琢者三矣古所謂
信讓以涖百姓則人之報禮重其在是乎銘曰

惟天惠人惟辟奉天利建元侯于藩于宣文武杜公端
誠絜矩化治陝服聿來茲土闢我烏鹵長我禾黍乃建
營部乃新廩庾成師足食比屋安堵里閭熙熙衍沃廡
廡十有三年慰安斯人雪泣抗章血誠上陳結戀明庭
不私其身樹善交代如公之仁考祥視履宜錫蕃祉寅
亮三朝是毗是倚密勿中樞矢其謀謬乃升司空亦作
司徒九賦旣平五教式敷中外之重惟公是圖彼都人
士飲公之德彼土樂康繫公之力永言介福祝我岐國
稽合聲詩于胥篆刻彼泉而實彼石而泐公之德輝永
永無極

唐故義武軍節度使營田易定等州觀察處置
使開府儀同三司檢校司空同中書門下平
章事符陽郡王贈太師貞武張公遺愛碑銘
并序

維唐十一葉皇帝纂大統建大中始初清明敷佑下土
稽四征六服之理閱先正宗臣之籍流慶斯復遺風可
懷繇是博陵上谷列侯二千石元僚司武從事亞旅上
其故府太師貞武公功德請銘於碑以示厥後乃詔小
司徒臣德輿因地域之名物酌軍師之憲令舉而敘之
公諱孝忠字孝忠其先燕人八代祖奇北齊右北平太

守封右北平王齊季喪亂實開邊隙代有長技軼於外
區會王父靖乙失活部落節度使王父遜部落刺史父
謚早習先職來朝上京星環北極輸君長之贄幣鵬變
南溟發邊關之導譯拜開府儀同三司他日以公之勤
累贈至戶部尚書公雄姿正志沉毅英達傳兵符於百
勝襲王爵於九代年未弱冠入侍明庭才爲異倫射必
命中以日磬之信愛受秦仲之車服自他有耀至是來
歸時立宗御天下四十餘載習文事而去武備人不知
戰恬於已然幽陵首禍穀洛怪駭公跡染汗俗心堅本
朝豈求生以害仁將蹈難以明義史羯繼亂猶居劫中

質其所恃無路自奮間道旁午密陳嘉猷俄而成德軍
節度李寶臣錫姓撫封同信臣之任就義若渴推心於
公綜其都軍以壯支郡乃策崇勲累居大官凡軍師之
禁令攻守之奇正成德之重必咨於公隣帥猖獗皇赫
問罪公出自上谷覘於貝丘寇徒六萬將犯中冀乘轅
外嚮方陣而前公以駟介千數颺馳急擊深入其阻夾
攻其堅敵人力屈昏夜引去遷御史中丞封符陽郡王
尋拜易州刺史加太子賓客以軍之輯睦移於郡以郡
之班制叶於軍文理武毅交脩四暢師貞人餽爲列郡
表儀初公與寶臣感槩於少年之場周旋於多難之際

迎導善氣切劇良規若驂有斬如熱斯濯異時自代前
定於公且曰輿師之心勲力之冠也俄然寢疾瘖不能
言猶以手指北矐然注目旣而惡子阻命陰交匪人因
喪以干紀專地而圖禍公驟諫不入飛章上陳請以州
兵首遏亂畧優詔拜工部尙書兼御史大夫恒州刺史
成德軍節度使一人注意四履專征糾合諸侯連收城
縣敗之於東鹿走之於常山以至斬首且無遺策轉兵
部尙書易州刺史易定滄等州節度觀察使賜軍號曰
義武時三分恒陽之地錄功有差而羣帥多心或懷缺
望太行而東疆場日駭且有從約皆爲假王公居其腹

心守正持重玉立於磷緇之際雞鳴於風雨之中靜柯
勁草在我而已彼朱滔者以燕昭公夸大煽結譸張指
斥公乃出和門以蒞衆援暎日以誓公義利之間死生
不惑且曰縣官之所以賦車宿兵下尺一之詔者在排
難扞患而已吾徒之所以乘堅馭良佩丈二之組者在
畢力致命而已碎首塗地吾無悔焉一心事君四面受
敵俄屬京師急變鑿輅時巡時太師西平王以禁兵自
魏來援於我於是與公決策赴行在所公素約以伯仲
又申之婚姻分銳師選良將授以赴蹈使居顏行斷金
之契匪石不轉定山東爲己任坐制羣疑清轂下爲前

籌行戡大憝赤誠相照血涕交頤西平繇是建大勲立
大烈而公亦靜深以制動貞厲以伐謀使其從散約解
无亡矢遺鏃之費者公之功也前此拜尙書左僕射至
是同中書門下平章事貞元元年就加司空凡授律行
師十有一歲承寧諸侯滅黜不端動有節制人斯愛戴
贍助其供養賻補其禮喪拊循接禮勞徠安輯幅以正
德而不怵於邪濟以守忠而不回於利章灼卓異有初
有終其居涼國太夫人憂也手植松檟倚廬於墓感致
瑞祉詔旌其門終身之哀加人一等不遺故舊皆以器
使戲下多善吏庭中無留事雖古人之威懷無以過焉

春秋六十二以七年三月感疾薨於位德宗皇帝不視
朝三日冊贈太傅詔即吏弔祠禮賻有加其後累贈太
師易名貞武追封上谷郡王易之大有曰信以發志禮
之中庸曰誠之不可揜惟公推本於是闡然而彰德字
宏大色容厲肅長才經武奇表出倫喬枝夏雲以直上
雄劍發匣而耀穎始以天寶十載受詔即戎授范陽郡
洪源府右果毅破九姓突厥改上黨郡漳源府折衝乾
元初轉左領軍衛翊府左郎將實鎮飛狐之地寶應中
拜左武衛大將軍加金印紫綬歷左金吾大將軍兼太
僕卿殿中監以至於專席賓護剖符建牙載居六官乃

進左揆燮和鼎鼐平理水土真食大封異姓而王積功
伐以崇厚履信順而光大壯武之後遠繼公台富平之
門時推德器豈徒然哉嗣子今司徒同中書門下平章
事延德郡王茂昭以全才休績保大宣力戴翼天子撫
征諸侯嘗以工部尙書建旗博陵以刑部尙書循方伯
之職特詔所理郡爲大都督府厯左僕射司空亟居代
官南北軍衛爪牙上將同氣分職寵冒一時侯王則銀
黃相映子弟乃金埒對起流光貽訓其信矣乎二十年
延德王以介圭四牡來朝京師德宗沃心嘉歎宴喜蕃
錫如韓侯申伯故事順宗繼明崇德報功乃居台宰進

掌邦教敦喻還鎮涕洟就途今皇帝以道御天下燭明
理本間歲再入覲爲守臣龜龍乞留京師以奉朝請堅
若金石激於肺肝服勤王家丕赫宸睠感念勲節顧懷
義方直以鄭武公桓公漢韋平父子古先懿鑠舉集公
門二邦幼艾千夫長百夫長沐浴風烈怵惕慕思是儀
古式以永光耀斯不朽之事也拜君命之辱而傳信焉

銘曰

天秉日星亦有風霆君用文德亦資武力太師矯矯生
我王國時或艱屯師惟壯直大蹇朋來其心不回好謀
而成義路乃開博陵上谷地直枿木旣夷狡童則理長

轂威謀抗厲命賜滌縛回回盜泉噉噉嘉玉凡我所履
與之豐福士皆買餘人以仰足凋戈衣章裕此一方追
錫吊祠禮優職喪司徒襲慶道叶仁聖三朝戴君皆受
四命覲禮煌煌嘉猷洋洋湛露彤弓威儀有光甘棠蔽
芾邵伯所憩緇衣改爲鄭國之詩仍代洪烈邦人戴之
永言寘懷乃刻斯碑

權載之文集卷第十一

權載之文集卷第十二

唐權德輿字載之

碑銘

大唐四鎮北庭行軍兼涇原等州節度支度營
田等使開府儀同三司檢校尚書右僕射使
持節涇州諸軍事涇州刺史兼御史大夫上
柱國南川郡王劉公紀功碑銘 并序

貞元十有八年秋九月皇帝以安定節制南川郡王昌
之休勲懿績與邦人臺老之咏嘆聲頌詔掌文之臣某
論次其詞以永金石臣拜稽首祇若休命於是考侯王

之表稽贊命之書採太常景鍾之義而繫辭曰惟元后
聰明齊聖以臨於下惟蓋臣厲翼莊誠以奉於上上下
咸龢協建皇極此南川所以感會神武發揚碩膚公疑
然持重爲國保障理涇八十五年政成事節師以律成
人以富教智若著蔡動如風霆內總端揆外崇長伯八
旒七章元袞赤舄有南仲方城之畧有充國劭農之績
君使臣臣事君君發舒震耀事業光大其理然也公姓劉
氏彭城人少沉毅尙氣節得大易之師貞春秋之武經
肇自幼學揣摩感槩天寶末年未弱冠從河南節度使
張介然東討林胡以勞署湯州遂城府左果毅其後所

奉之府則李太尉光弼劉司徒元佐或盡護車賦率先
顏行是爲腹心節以金鼓軍之善政無不參焉師之右
職無不綜焉遷至開府儀同三司於列卿爲大僕太常
於御史府爲中丞大夫歷太子詹事左散騎常侍工部
禮部二尚書異姓而王宜食其賦凡三益封至二百室
初拒史朝義也宗之郡將委以扞城賊鋒持久力屈引
去又皆留其戲下劇虜濟以利兵鈎援臨衝環城傳堦
公以淮海屏蔽實繫於斯血誠怒髮士氣旁厲周月堅
拒援師實來以愜愜之危走婪婪之狄始佐宣武軍也
任當委重往必投艱旣定彭城之急旋假濮陽之守主

忠信以任患難整偏師以立奇功奮其材謀多所剋獲
抗希烈而壁寧陵也以徒兵三千組甲五萬登陴搏戰
且逾四旬激衆扶傷竟申九拒於是救淮揚振大梁或
倍道以赴晨壓其壘或鼓行而進終覆其巢於此二役
也擒翟暉虜鄭賁師不留行甲首山積然後窮追急擊
至於許昌渠魁窘困終以泯滅凡三與虜犇而河汴之
間乃平皆公之爲而元佐任公之効也故旬歲間累居
大僚貞元三年朝廷以五原盛秋式遏侵軼詔公領宣
武駟介北出護邊有逗撓犯令者立斬三百人以徇傳
技肅然威讐朔野俄拜本軍京西行營節度使雖拊循

行師未有分地而車服恩禮已如守臣明年遷四鎮北
庭行軍兼涇原等州節度使度支營田等使涇州刺史
是拜居秦之北地漢之回中俗修武備而尚氣敢自馬
司徒璘段太尉秀實之以威望德聲懷寧邊部其後則
禍拏師老疆場蕭然或依違選愞日闕而已昆夷游騎
時及我郛西門不啟南畝益蹙公曰兵以奇勝亦以嚴
終寇不可翫在吾穀中矣於是建長利規遠畧程日力
興人徒西城平涼開地二百里據彈箏峽之嶮北城保
定深入百餘里扞青石嶺之固凡七城二堡有堅甲利
刃制彼衝阨絕其驅侵公之封內燿燧滅息昔之甌脫

今有市列井樹之間犬雞相聞東諸侯勤王之師得以
 寧宇而又因士之餘勇求地之遺利荷戈而戰擁耒而
 耕出聞三捷之績居盡四支之敏闢彼墉磽麥禾蔽野
 亦既悅使而皆樂從十二年就加尚書右僕射威功既
 成教化既明里閭有豐年亭鄣有吉語其或四方之旅
 謁急於公則耀威於長武納將於歸化皆稟睿畧而奏
 成功十五年條軍市之租上獻天府數至十萬以贍東
 師銳於為國遠慮數言邊事蓄資力修賦輿思欲大舉
 衝擊收功絕域之外豈徒使朝那陰密緩帶安枕而已
 哉惟公瓌姿碩量侷儻英偉文理武毅冠於羣倫雲蒸

風行交感至用志氣申而功業大寵嘉集而名器崇至

風行交感至用志氣申而功業大寵嘉集而名器崇至
若勲身惠人勞俸安集遵守條職貫通典彙有行父事
君之心有考父益恭之德可以表率發於純誠宜其長
保富貴爲時元老昔尹吉甫美宣王任賢使能作江漢
烝民之詩惟聖人感人心以和平天下惟賢臣協聖謨
以鎮靜方國則皇帝之注意南川之陳力是信是使有
嚴有翼敷宣景化浹洽休德不然則被邊戴白之叟披
肺肝排閭闔而胡爲來哉敘武畧所以揚天聲美元侯
所以流王澤敢附雅頌式昭德音銘曰
天地健順三辰光潤君臣感通一德誠信皇明照燭保

合休運亮采有邦登昭傑雋帝曰爾昌碩勲洸洸爰自
偏師幹不庭方席勝無前援陳下梁爾戰則克爾謀則
臧公拜休命藩宣賦政介圭暢轂撫是安定其猷克壯
上協仁聖沛然成功執德之柄乃峻壘垣壘垣崇崇乃
藝黍稷黍稷芃芃出有銳師入爲良農保就滋殖時公
之功武經輯矣文事亦理十有五年肅清邊鄙宜登介
祉永錫遐紀告類納忠以毗天子皤皤涇人俯僂上陳
肅肅王命命茲下臣采獲誠詞章明異倫鏤此貞石輝
光日新

大唐湖南都團練觀察處置等使朝散大夫檢

校左散騎常侍持節都督潭州諸軍事兼潭
州刺史御史中丞雲騎尉賜紫金魚袋李公

遺愛碑銘

并序

皇帝在宥天下十九歲覆露元元東求官師六服羣辟
辯章教化歲九月制詔湖南長師中執法李公巽爲江
西申命小宗伯呂公謂爲之代於是循其功善跡其故
實百城之吏言於郡伍府之長欵於軍鄉部僑舊華顛
卬角一其音詞奔走理下請鏤金石以爲表式呂公以
公之馨香可覆視而不可誣也衆之咏嘆可論次而不
可遏也悉以列土實蒙可報乃類其言而文之云善爲

理者必因其俗而求所以便之因其便而思所以化之
惠澤被而五教行財用足而百志成上下熙熙臻於洽
平古之循吏公之報政皆是道也公字令叔趙郡贊皇
人曾祖知讓皇河南府長水主簿祖承允皇任朝散大
夫江州別駕考焜皇右武衛錄事參軍代名文行爲北
州冠族公始以典學含章立於清朝詳平憲令閑練程
品秉直不回得時寤明能抗駁論輒還成命人之所難
於公爲易惟天愛人惟聖法天欲其善利逮下也故詳
試公以政事其初由殿中侍御史爲美源令由刑部員
外郎爲萬年令由左司郎中爲常州刺史邦圻和寧京

邑肅清居部考課爲諸侯表率是皆章章已然之功也
貞元八年冬十二月由給事中至於是邦長沙九疑澤
國回遠徵令頗繁物力或屈歲杪逋負夫家病之人未
安於里落程不給於公上公乃嗇其經用代其賦輸厚
施已責過於萬數得以贍助使之均安又以支郡地征
有繫軍實量力調穀減輕緡錢經始致用爲之倉庾時
其發斂而歲無凶荒以封內饋饟道路風波轉漕汭泗
僦載煩苦僦功度木爲之舟楫程其遠邇而師以足食
以邑里湫隘之不宣也則闢其塗巷以利之以室廬苦
蓋之不固也則教其陶瓦以易之講功慮事以建長利

如此之備也稽先師之教以進儒術庠塾經明歲時計
偕出入阡陌燠休農里無告則加其餼發聞則弛其征
鄉無不率教者修司馬之法以宏其事器用犀利賦輿
輯睦拊循以誠少長有禮事親者賙其供養被病者恤
以醫藥士無不買勇者精力賦政以之鎮靜如此之至也
唯公直而和肅而寬縝密而智溫良而能斷秉心砥平
涖事風生法制定於上奇表絕於下故下車而安已日
而孚期月而政成五年而增秩六年而進律德風下偃
協氣旁達丕休乎哉前後與公交代於是邦者皆以密
侍右職來施美化裕茲一方其天意乎昔弱翁次公率

以郡國理行入當柄用然則三湘九江之地豈得顯受
公之賜耶太師陳詩觀風諸侯言時計功皆前志也暨
魯大夫請於周而史克有駟駟之什今潭人以德輿再
拜奉命書獲知懿績俾章善頌永篆樂石銘曰

帝命元侯允釐方州郁郁李公此焉輯柔洞庭南匯熊
湘經介下爲度制上以藩衛彤襜淑旂四牡有輝授茲
介圭輟自黃扉吏絕私回俗無尤違保惠教順樂郊焉
依乃倉乃庾克敏農穡乃剡乃剡利涉不息乃端徑術
乃導埏埴政成事時節費寬力七郡清靜百嘉蕃殖誠
以愛人滋於樹德今則去我隣邦是式祝公伊何上贊

皇極報公伊何惟金石刻載茲聲詩永慰南國

唐故光祿大夫檢校太尉兼中書令成都尹劍

南西川節度副大使知節度事并管内支度

營田觀察處置統押近界諸蠻西山八國雲

南安撫等使上柱國南郡王贈太師韋公先

廟碑銘并序

萬物本乎天人本乎祖乃立宗廟以交神明德厚流光
追養繼孝順而下之曰義等而上之曰仁國家稽合禮
文損益前載崇功貴仕得祠四室於王制酌諸侯二昭
二穆之義於祭統見君子盡志盡物之誠惟太尉兼中

書令南康郡王懿文經武保合昌運左右德宗格於皇
天始恢隴坻之旅終化岷峨之俗貴爲上公位極元台
克肆忠力乃圖孝享作新廟於京師大安里古者揚其
功烈銘於祭器近古以魯鍾衛鼎追琢先德不若鏤文
字於麗牲之碑之爲詳也乃謹如書之云公姓韋氏京
兆杜陵人自扶陽重侯用經明至宰相後裔蕃昌德與
位偕積十六葉至公六代祖範字元禮以字行於代仕
周爲車騎大將軍入隋爲沂州刺史啟士郢城易名曰
莊實生孝恪雅有文憲武德初侍御史爲洛州別駕洛
州生司馬府君諱機爲第一室端誠正志休有厥聲專

對出疆艱貞復命著西征記以獻太宗嘉之剖符檀州
修起儒術二典卿曹陟降屯夷操持貴倖不避強禦繕
理宮室得其時制史氏書之爲唐名臣以夫人隴西郡
君辛氏配司農生坊州府君諱餘慶爲第二室清和修
潔履道不回歷右騎衛兵曹參軍以至二千石以夫人
武功蘇氏配坊州生贈太子少保府君諱嶽子爲第三
室方嚴貞幹政事修明在母后時以直忤旨由太原令
移佐睢陽出入四朝績宣中外歷殿中監剖符八州廬
海湖虢眉徐衛陝所至之邦有威有懷凡再造命以夫
人扶風郡夫人竇氏配少保生贈太子太保府君諱貴

爲第四室盛德循行含章自牧厯藍田尉淑聲流聞上
纂崇厚下貽風訓凡三追命以夫人涼國太夫人段氏
配噫嘻自扶陽至郿城積丕烈於前史自考廟至顯考
廟流熾昌於後葉列於禘嘗儲厥義方故南康王苞五
常貞四教秉靈傑出含道中立其初誓偏師建奇功扞
大患立大節以儒衣法冠授律鑿門佩亞相之印綬脩
元侯之節制就加宗工入掌金吾撫征全蜀命賜備厚
由地官轉天官叅總端右平章宰政進中書令加司徒
太尉鉞鉞拒鬯旂鑿琫戈有嚴有翼乃蔚乃赫忠厚博
大以阜俗信廉勇仁以成師南蠻納邸西羌解辯象胥

釋戎捷樂府陳夷歌守正持重推誠畢力開地通道者
九千餘里生聚教訓者二十一年天文紀功刻在金石
暨德宗奔天下太上居諒闇危言急病體國忘身毅然
君子之道卓爾大臣之節永貞元年秋七月考終命於
理所冊贈太師有司奏諡曰忠武公自廟成距今凡八
年矣公以天子守臣安危注意不得視滌濯承吉蠲而
元兄國子師業聿實奉朝請薦其常事孝友而才稱於
士林初公之仲兄曰暈屯田員外郎贈鄧州刺史叔氏
曰肇太子左庶子兼御史大夫贈左散騎常侍咸以器
望而延褒錫公之夫人贈魏國夫人張氏其祖彌與外

王父皆秉國鈞爲天下華腴嗣子工部員外郎行立銜
恤無怙齊喪中禮大凡四廟之支旁尊羣從喧赫昭融
不可勝書至若質明光近沐浴盛服虛中而理嘉薦匪
懈而無違心大饕沉齊馨薌滌鬯旣思其志意若聞乎
容聲洞洞乎屬屬乎有以見舉十倫而備百順昔素王
云以戰則克以祭則受福其斯之謂乎司業悼手足之
凋落感春秋以悽愴永懷明發俾篆斯文銘曰
新廟有恤靜深奕奕孝孫匪解元衮赤鳥洪闕章章乃
侯乃王漢稱扶揚唐有南康二十三葉沛然蕃昌四室
崇崇斯焉享嘗烈烈南康溫良能斷謀猷罇俎文武貞

幹汧岐之西禮洽銷散井絡之下天文昭煥撫封全歸
冥漠德輝聿修孝享家法無違以昭以穆以似以續和
氣婉容苾芬烹熟子孫大小罔不祇肅神之聽之報以
介福

大唐金紫光祿大夫守司空同中書門下平章
事充太微宮使上柱國燕國公于公先廟碑

銘并序

國朝之制二品以上祀四廟三公品第一雖有始封亦
不敢逾焉元和五年相國司空燕國公立新廟於京師
蘭陵里司空公以文武偉才肆勤納忠外貞師律入作

公相以平水土以調陰陽深惟祖禰尊尊之義昭穆親親之道乃圖廟食以永代德公姓于氏河南人七代祖謹後魏柱國大將軍周太傅三老燕國文公六代祖實周大左輔隋贈司空燕國安公五代祖象賢隋驃騎大將軍禽昌定公惟三葉有大勲力於北朝乞言而爲悼史體國以書功令以至公四代祖益州郫縣令諱德威夫人京兆韋氏曾祖綿州顯武縣令諱互範夫人北海唐氏王父贈刑部尙書諱汪夫人北海王氏烈考贈司空諱復夫人贈邠國太夫人京兆韋氏凡宗廟之數郫縣爲初室顯武爲二室尙書爲三室司空爲親室其配

各以夫人氏交神明之道也惟郛縣顯武遵道服儒廉
退潔修且曰邴曼容陳仲弓吾之師也故仕不過六百
石而以理効聞尚書湛冥善閉舍道特立以應士燕居
至於沒身凡三追命至大司寇先司空廣大而靜恭儉
而好禮合二雅修四教推明理古之學貶絕非聖之書
而恬智交養龜頤不惑起家益州東陽主簿四徙官至
寧州真寧縣令又再轉至泗州別駕祿至卑而仁及物
道未泰而志不懾公卿大夫之間尊有道而踈利權天
寶未宰府擅朝惡其剛介不附已故官止郡佐而慶延
身後朝典加恩亦三追命自密州刺史吏部尚書以至

于論道焉長子頗專良有行終洋州司戶參軍冢子頌
貞幹強敏程功賦職歷戶部侍郎以公事貶泉州司戶
贈楚州刺史幼子項吏理清明仕至長安縣尉司空卽
第三子也英明閎達剛方博厚才可以扞大患學可以
析羣疑彌綸中朝則尚書郎京邑廷尉皆有懿績惠綏
外服則湖蘇號陝二千石察廉克宣功化繇山南東道
節度使平章事入覲居中冊拜顯尊紹文公安公之爵
地展盡志盡物之誠敬悽愴休惕精明吉蠲詩曰春秋
匪懈享祀不忒司空當之矣又曰以委以侑以介景福
先公宜之矣公又狀先公之行其大畧曰孔宣父應聘

木齋文集卷之三
三
歷國困而老於洙泗我先君宦學於天寶之年而操之
者甫忠

謂林甫國忠

先君能無窮乎又曰小子不敏不

通先君之大道不識先君之大行不肖之罪也凡類是
者千餘言其太史公自敘之風可以論譔酌之祭器德
與外王母公之從母也故其門中風訓獲周知之忝備
重任在公下列公以廟銘見授頓伏上聞尊嚴咫尺實
奉面命其在傳信不敢曼辭銘曰

燕文三老弼魏佐周安公定公亦播厥猷郟縣顯武一
同丕矩尚書司空三命追崇義訓忠教公台輝耀乃封
故地乃建新廟新廟是宜羶薌吉祠齊明盛服乃順乃

時卑靜以正如親聽命求福不回孝順以慶刻銘斯碑
以代烝彝

大唐浙江西道都團練觀察等使潤州刺史兼
御史大夫河南郡公薛公先廟碑銘

古諸侯五廟大夫三廟廟在其國聖朝以官品制室數
侯伯理外而廟在京師其或覲於明庭入爲孤卿則吉
蠲懋信展敬受福居常則冢介子姓薦其常事優然肅
然追養繼孝之義重焉元和五年歲直庚寅浙江西道
都團練觀察使潤州刺史大夫河東郡公薛公萃建先
廟於長安縣永安里其祠三室初薛之先在殷爲左相

在周爲侯國至漢御史大夫廣德爲宣元名臣從廣德
十三葉至後魏安西將軍涪陵侯謹乃分五房又四葉
至隋禮部尚書道實道實生皇尚書議曹郎德儒德儒
生寶積濟齊潤三州刺史揚州大都督府長史寶積生
代州定襄道行軍司馬待詔公之曾也爲第一室夫人
京兆韋氏配焉司馬生衛王記室太子司議郎贈太常
少卿佖公之祖也爲二室夫人范陽盧氏配焉太常生
京兆府奉先縣尉贈工部尚書順先公之禰也爲第三
室許國夫人吳氏繼夫人同郡裴氏配焉惟司馬以兵
鈐機畧恢武經邊備惟太常以端士雅文仕王國宮朝

以至先尚書含道安卑四命官而再結綬始仕巴西與
楊國忠爲寮比乃操柄銳於引重賦詩謝絕不屑就焉
獨用義方以振家法積厚餘慶河東公實承之公忠敏
廉直和恒簡惠爲政事吏師於文章爲聲詩所施在樂
易所至有風采京邑肅清號人理平今皇帝馭天下之
初推擇方任聯命爲湖南浙江東西三道長帥歷御史
中丞就加御史大夫凡三方二十郡皆據蕃善地人受
其賜班制規爲四封宜之乃朔廟貌以嚴祀事楹階俎
豆之飾儉而中節口祔盟薦之儀質以盡敬水草陸產
血毛幽全柔嘉滌濯休惕悽愴思志意以如在交神明

而來格君子曰祀之忠也其若是乎初公之伯氏仲氏
曰萊曰莘許國夫人之出而代宗從母母弟也勞謙淑
均不自驕盈以功次奉朝請皆至贊善大夫以沒公之
母兄曰芳稚有器幹爲北都命介由御史府入爲秘書
丞亦不至大官抑代德鍾美朋三壽而享五福者其在
季乎昔魯以閔官受祉衛以烝彝崇孝酌用古義揭於
茲碑其銘曰

宗廟祭祀禮之重事亶亶河東尊仁安義薛爲諸侯爵
列春秋在漢廣德亦居大夫厥後焜煌三祖五房如山
崇崇如水湯湯河東楨幹纂服周漢乃尊藩衛乃長邦

崇崇如水湯湯河東榘幹纂服周漢尊濬衛丁長

憲祠宇碩曼蒸嘗嘉薦求福不回降福孔偕入室出戶
周旋敬齋麗牲有碑乃琢乃鏤河東孝享永示厥後

開化圖書
Wahua Libr

權載之文集卷第十二

三

權載之文集卷第十二

Washington Library

權載之文集卷第十三

唐權德輿字載之

碑銘

唐故朔方河中晉絳邠寧慶等州兵馬副元帥

河中絳邠節度營田觀察處置等使元從奉

天定難功臣開府儀同三司檢校司徒兼中

書令河中尹上柱國咸寧郡王贈太師忠武

渾公神道碑銘

并序

天地訢合以生百嘉其成歲功也則有震耀肅殺之助
焉君臣保乂以熙百志其講武功也則有經綸翼戴之

輔焉龍蛇起蟄山澤通氣與運相值有開必先斯太師
所以宣力四方稽暮七德輝耀威靈勒身濯行霆擊風
行乃緝熙於光明故琬戈淑旂以嚴師律黃流元袞以
正台耀湛露彤弓以覺報宴納書追命以榮恤禮藩錫
始終如公之功公諱瑊字某其先夏妣之後爲淳維漢
劉之代爲渾邪或強爲與國或分以保姓貞觀中開置
州壤就加官師曾祖元慶皇豹韜衛將軍靈丘縣開國
伯祖大壽皇太子僕贈尚書左僕射考釋之皇開府儀
同三司太常卿兼御史中丞寧朔郡王贈司空惟靈丘
紹先公之職居次卿之重僕射以積厚克家寧朔以偉

才雄邊貴仕崇勲乃裂茅社流光追遠是加密印回復
介社間生元臣功昭於前人德合於大君建中癸亥翠
華西狩公以大司馬艱貞翼從部勤戎車揣摩殺機勤
勞行內爲上心膺登壇授律誓命交感如漢拜淮陰侯
故事而又加焉乃進左揆遂參大政惣賦輿而爲之師
長恢王畧而以之北伐兇黨盡銳壁於武亭公以事鉅
師老則傷威重正合奇勝在於疾力奮寡擊衆鼓行無
前殲夷潰溺如建瓴水中堅席勝又覆於咸陽長轂啟
行旣門於延秋會西平王以東諸侯之師清宮獻捷公
乃抑其賈勇須彼成功室士心之尅伐息兵火之氣燄

然後窮追斬級寇孽以平備法從於清蹕捧大明於皇
道告類薦功登拜上台撫封尹正復與虜牝時北平王
出大鹵收絳臺而公已總成師下左輔於是輯忠力揚
奇鋒復離宮拔堅壘衝陣壓竟傳於蒲津金鼓之聲氣
相合山河之表裏皆復渠魁授首師帥協附安流以濟
方軌而前士不離場工不易肆二寇正刑四方咸和論
道進律乃平水土秉誼靖人以脩班制休嘉貫於草木
利澤逮於鰥寡言爲軍志勤爲吏師貞元景子政成一
紀進掌邦教遂居右弼十五年冬寢病十二月辛未薨
於理所享年六十四皇上悼歎不視朝五日冊贈太師

贈襚吊祠有司備物大僚襄事明年二月甲申葬我太師於萬年縣洪固原太常跡其功德奏諡曰忠武禮也初公年十二以將門子仕於邊部未弱冠五遷至左驍衛將軍始從朔方之師戰黑山次從隴右之師摧石堡又嘗西出臨洮奪昆夷之善地而爲之壁壘北絕大漠破獫狁之堅甲而焚其廬帳又從汾陽王臨淮王討反虜於山東南攻贊皇北取真定射其特將李立節貫於左肩斃之又五遷至大卿皆以功次其間開地於河曲以靜九蕃宣威於陝西乃定三川凡王師之所以剋獲都邑元老之所以發揚蹈厲公必居其先偏而當其勅

劇故以御史中丞爲靈州左司馬以御史大夫爲邠州
刺史以工部尙書單于大都護專征上郡榆林之地入
爲左金吾衛大將軍又以戶部尙書奉普王出車自時
厥後投艱感槩能納大忠以恤大事理蒲十六年再陟
公台以司空兼侍中以司徒兼中書令大凡厯官二十
八次眞食千八百室居節制者五副元帥者四材力絕
人始封樓煩方內治平乃進咸寧凡汾陽王九伐之勲
公皆左右四履之地公皆踐厯憫冊師禮法謚尊名公
皆如之時不至者壽而已矣惟公厚性寬中智謀深靜
秉義類以賦明命植端誠以糾王慝講功述職遠意長

利執德之柄蹈禮之輿致其用以格天啟其心以沃聖
協建皇極爲宗工元龜雅好左氏春秋班氏史得考父
之恭范宣之讓驃衛之功畧黃韓之教化又嘗慕太史
公自敘著紀一篇詞不矜大而事皆明備有子五人曰
殿中少監鍊太子中允鎬太子司議郎鉅櫟陽尉綱雲
陽尉鏃著位於兩宮以奉朝請試吏於縣內以循事任
食德而才稟訓而忠皆以純孝致其哀敬令弟輔國大
將軍右領軍衛將軍武當郡王玘與諸孤等推烝彝景
鍾之義因職喪以聞有詔詞臣刻石傳信乃採其贊書
侯表作神道碑銘曰

北戴斗極陰方尚武元金朱輻錫命都府太師間代感
會雲雨四征庇人九合尊主昔未成童則能肆勤卓行
深入致果忘身弱冠推鋒環列南軍中與之後書杜策
勲援枹兩河轉戰三秦靈朔郇知所居必聞出統藩衛
入司徼巡時丁阨難節冠羣倫逋詠煽結狂穢宮闕西
平鞠旅公亦受鉞旣臨延秋如火烈烈休士退舍時惟
不伐祗沴濛濛蒲津未通北平釋位公實撫封胥命長
春克咸厥功開壁勞軍靡有不同以律則臧在和而克
時惟太師有嚴有翼乃敷仁澤乃布條職時惟太師有
功有德三公二府是獎是陟祿印易名以尊以飾材官

介士鹵簿悽惻大隧鮮原中南之北萬邦作憲永代是
式追琢馨香與唐無極

唐故正議大夫守門下侍郎同中書門下平章

事成紀縣開國男賜紫金魚袋贈太子太傅

貞憲趙公神道碑銘

并序

在漢孝宣厲精理道則有魏相通故事邴吉知大體百
職修明中興有聲惟皇帝在位十四祀得賢相成紀公
趙氏受天清淳佐時緝熙本洪範之正直躬大雅之明
哲右輔左弼調和鼎味降祥而生盡瘁而終時貞元十
三年年六十一皇上震悼不視朝三日詔奉常具儀法

冊贈太子太傅又俾百執事爲位哭於其庭吊祠禮賻
率有加等二府之屬或銘其德於壽堂或狀其行於考
功有司稽實諡曰貞憲公之盛業斯謂不朽又舉其始
中終之畧識於神道公諱憬字退翁天水西人其先成
子之文宣子之忠文子之知人左丘明太史公實書之
曾王父仁本皇司列少常伯同東西臺三品以忠清厲
翼多所發明乾封總章之際號爲稱職王父贈趙州都
督諡厯右司郎中乾封縣令司僕少卿烈考贈鄭州刺
史道先仕至洪州錄事叅軍惟祖禰含章故慶延追錫
崇構丕矩復大於公公保抱之歲生知色養羈冠之年

則無幼志及夫被儒服踐法言敬直而文肅莊而溫端
誠博物錯綜今古非大中至正不接於心術寶應中元
宗肅宗幸梓宮有司議方中復土之制時西鄙日聳歲
饑人流公以王者追孝恤禮宜儉褐衣上疏詞約指明
君子曰此劉更生諫昌陵之言也息偃江介名聲籍甚
始佐州師乃辟戎車自試守江夏尉三遷至監察御史
其後翹車繼轍賢侯虛左大凡難理之府皆待公爲重
厯殿中侍御史太子中舍丁太夫人憂柴毀孺慕殆將
死孝感導善氣降爲嘉生有芝煌煌秀於壤樹之側公
默而去之人莫知者旣免喪徵拜水部員外郎未幾檢

校工部郎中副湘中七州軍事居一年詔領留府尋踐
方伯以中執法錫金印紫綬罷秩家居拜給事中執法
懷和北狄有下嫁冊命之禮復兼憲丞以副皇華旋軫
未至遷尚書左丞俊父用彰皆以貞勝其初撫封上狩
於漢中守臣之任憂寄愈切公恤隱布和仁而愛人輿
師知訓善吏樂職行之三年教化明備底貢有藝賦政
不煩潔矩以杜竒表露章而無吐茹飛語雷動明誠山
立受代踰年事實敷聞故有左曹之命講貫舊章惟真
是視刑或失入議將必還公望日盛其勤靡盬故有和
戎之役致賜諭旨協寧殊隣疆場之言專對而不貽紀

綱之僕承事而不征保就安利北方感悅故有在途之
拜整南宮之紀律稽郎吏之功緒風望素重法制有精
嘗歲終舉吏可以長人者或以其細故深詆將以病公
公乃移書自訟請下其考有博大之度無怨欲之私一
臺承式六轡在手持綱體要善否有章故積公輔之望
貞元八年夏四月拜中書侍郎平章事明年五月轉門
下侍郎以厚德載物以全才宣化舉直盡忠敷納將明
正百度之本去一朝之便事有統紀心無面從嘉謨匡
言鎮定宏大謙厚而不伐持平而易閑邪塞違貞厲
而不校陟恪始終帝載用和戲夫先常伯歷左肅機東

臺侍郎克著休功再叅大政公皆踐之是以似之嘗以
爲漢廷諸公罕備其用以石慶之醇謹而不能關決薛
宣之方畧而失於煩碎翟方進之通明而固其位公孫
宏之節儉而近於名公偏有其長彼實多缺唯丙魏所
履我無愧焉向使慤與之年盡行其道則公之所化可
勝紀乎故其登庸也士之仁者相賀而不仁者相吊其
全歸也士之仁者相弔而不仁者相賀斯可知矣至若
睦中外之姻而均其祿賜嚴宗廟之祀而不理第室啟
手足之日家無餘財奉終卽遠待恩禮而後備難矣哉
嗣子宣亮全亮元亮承亮等伯季以門子爲宏文生叔

仲始解巾授祿皆稟德風幼而孝謹以十一月景午時
得吉卜奉公之喪祔窆於河南緱氏縣景山之原禮也
以德輿叨居宰士嘗辱深知職奉贊書備詳盛烈俾刻
金石聞於無窮銘曰

晉有成宣代稱忠勲先正常伯匪躬事君纘復於公爲
時獻臣德不踰閑心不違仁貞其所履以翼天子大猶
是經中立不倚乃賦明命宜躋遐紀吾道方伸修途遽
已緱原蒼蒼宰樹成行令名章章樂石在旁噫嘻太傅
之風永代不忘

唐故東都留守東都汝州防禦使銀青光祿大

夫檢校吏部尚書判東都尚書省事兼御史大夫上柱國扶風縣開國伯贈太子少傅杜

公神道碑銘 并序

歲在戊寅夏五月甲子居守天官扶風公以病就第考終命於京師永命里春秋七十四越三日丁卯追命爲太子少傅秋七月甲子歸全於萬年縣少陵原前此又詔有司以鹵簿鼓吹飾其儀法以德以勞以榮以哀馨香光大爲宗工表式公諱亞字次公漢建平侯延年二十一代孫曾祖立道皇右千牛王父含章皇上郡司馬贈岳州刺史烈考繹皇忻州秀容縣令贈左散騎常侍

公承積德之淑靈稟中和之粹精山立陽休得時大行
歷諫議大夫給事中再兼御史中丞繇睦州刺史入爲
刑部侍郎三兼御史大夫檢校禮部吏部二尚書正色
於朝而文憲損益懋功於外而藩服輕重宣力以肆勤
納忠而愛人稽於制導以善利魏昭子能理大官趙文
子能恤大事足以斷國論謀王體殆不可及已早歲州
里舉經明旣授初命以爲大廈之材不可以植培壤南
溟之翼不可以棲榆枋於是初服燕居博通羣書深探
理古之道焯見天人之際天寶末盜穢兩都宣皇在岐
褐衣召見前席三接實貢昌言以扶大統乃以處士授

校書郎其後三辟大府五登郎位請議善價必歸於公
大厯中宰府擅朝交利崇黨司諫八年疑然貞厲盡規
時疾天下直之權臣旣誅乃擢左曹先是魏壁未下東
師旣老密疏方畧深圖理安再勤皇華大布清問導以
善氣灑其他腸不寧方來克協宸慮故先皇今上皆以
公之才可以大受姑以九牧四征試其多能鍾陵上游
提封七郡命公以廉問之政師役之後因緣煩費雜征
逋賦盡削其書未逾年而庸亡自占與夫家相半能厚
下矣函關陝服介於周秦命公以藩屏之任化用清靜
身為律度里閭無吠犬府庭無諍詞四封之內幼艾相

賀能去煩矣河靈蒲坂陶唐所理命公以尹正之重地
本沃饒化之純儉盡以解梁之鹽歸於有司凡緡物錢
之息其出池澤之賦其入歲一萬萬率皆罷廢不以利
爲利矣揚州葆強都會庶富命公爲節制之帥日講軍
實歲修職貢師貞人和政成事時河渠填淤積歲爲病
乃醜二浸於蜀崗之西濬舊坊以股引順地泐而啟閘
滌源導滯力省功倍邗溝之人受其賜而頌歌之矣勤
學在公盡瘁其身上思褒優之禮乃命保釐之任昔在
成周三后協心公率其道寬而有制且以洛苑汝墳弃
地可闢藉其介夫頌以稼器歲皆登成人用洽和地官

以之省費游手以之務本分正七年厥後用加徵還京
師日俟其復天則不吊竟孤人望夫人范陽郡夫人盧
氏茹未亡之哀旣虞而終無子以猶子某爲後悲夫初
公文章合雅議論經遠見知於太尉房公瑄受辟於衛
國杜公鴻漸以志氣才業英華博厚合於彭城劉公晏
贊皇李公棲筠以道義經術研機盡性合於司徒楊公
綰司業張公參或以公得時中之道或以公有事外之
致皆曰聆次公之言可以書紳作憲至於博約後學章
明遠至有闕里之善誘焉有平輿之深鑒焉噫嘻昔漢
武帝以韓安國爲國器劉向謂董仲舒有王佐之才當

理平之時或蹇或徙止於御史府膠西相竟不得總秉
國成扶贊化育則公之位望終不相配亦如是耶昔魯
視豐碑衛銘烝彝近古鼎不以窆追琢介石榻於道周
參魯衛之遺也公從父弟太子賓客黃裳得位相倫友
悌相輝功衰之喪加入一等以德與辱公之知碑論風
烈懼詞之不敏而無愧焉銘曰

昔在周邦實憲吉甫於惟杜公亦備文武武弁峩峩玉
聲鏘鏘公在左垣羽儀周行鈎膺濯濯文馬翼翼公爲
元侯表率方國推誠導利興事任力陟恪清時作稽忠
德冢宰是職周郊是式宜永介福如何不淑壽堂幽閔

綖印榮飾勒銘於茲山石無極

唐故劍南東州節度副大使知節度事管內支
度營田觀察處置等使正議大夫持節梓州
諸軍事守梓州刺史兼御史大夫護軍賜紫

金魚袋贈禮部尚書盧公神道碑銘

并序

惟盧公諱坦字保衡涿郡范陽人也代爲北州冠族曾
祖審經皇齊州祝阿縣令祖河童徐州豐令父巒明經
上第贈鄭州刺史仍代以六百石廉厚有循化光君子
名經澡身曠僚追命至公始延耀發舒咍赫顯尊乃舉
較畧以施金石公始爲同州韓城宣州宣城鞏縣河南

四縣尉監察御史裏行殿中侍御史內供奉真爲殿中
侍御史戶部員外郎尋轉庫部員外郎刑部郎中皆兼
侍御史知雜事拜御史中丞除右庶子又以御史中丞
爲宣州刺史宣歙池觀察使入爲刑部侍郎轉運鹽鐵
使戶部侍郎判度支又以御史大夫爲梓州刺史劍南
東川節度使元和十二年秋九月薨於位其年六十九
公含章特達剛建篤實粹溫而有遠猶忠厚而無流心
自周圻滿歲令聲籍甚時宰得君實公之私口其燠灼
不受慰薦徐用常調復還洛都其仕外臺贊佐東都守
臣寢病中貴驕暴以甲士五百棲於府中衆情怪駭慮

有急變公感槩憤怒以正詞讓之匪人慚悔回慝不作
其佐轉輸事任循明河之舊防有梁公堰者發決歲久
爲之濬理鍾水導滯厥猷茂焉李錡以戎車督運貪猾
無狀公端正中立用十年不徙官與從事李約李稜暨
今相國裴晉公相繼引去其在憲司貞厲閑邪元和初
天子憫人之重困徵貢之無藝方任受代至京師尙修
任仕者俾論如法赦令懸焉梁閩二鎮首奸斯禁公立
奏劾使待罪於朝多士竦聽四方風動李錡之誅也旣
絕屬籍有司請發其先墓自懷安而下悉皆夷之公諫
曰神通有佐命勲乃國之宗臣守官以死奈何一旦以

錡故而戮斲九原上改容嚮納特給五家灑掃冥冥之
下將加法而加恩君子多之其在宣州歲丁驕亢順其
發斂以救艱食潤渚田於壅弃置種食於鄉亭多方愛
人人用饒給或曰持力盈矣盍上獻乎公曰勤人市恩
所不忍也出軍食繕錢四十萬以代征徭爲秋官領使
去冗食百輩自江而南均輸池澤委分部大吏得命其
屬以能否進退公不撓焉責其成以驚功吏採其要而
得均節其爲地官也以府帑之羨繕終南宮百堵皆興
六職以嚴備邊力嗇者費大萬兵食以饒亭障以安有
臨淮守前涖事於代北者或告其畜馬百駟且有奇種

事下於公公使從事覆之上遽命小黃門按之公曰如是則廷臣可疑近習可信臣不敢奉詔疏三上上方感納七年河流毀西受降城城守以聞宰臣請徙於天德公曰河決不過退三四里功費無幾何天德壻礮回遠非所利也時之宰臣議異故公議格而有梓潼之命其後城守以憂死代之者人歸咎而戍之盡屠其家天德幾亂公之前知若著蔡焉梓人自井絡挺災侵淫亂晷逮公至也理之如家雜征牟利者去之邊防虛籍者實之底貢之外無異獻吏祿之差有恒給師貞人勤政事和理鎮安一方而大庇廕之樞輅之引鰥孤哀送自鄴

中至劍門以五百里祭奠相屬有詔贈禮部尙書不視
朝命著作弔祠法贈加數母弟前絳州刺史常師以器
望厯中外以友愛重人倫長子玠壽州霍丘尉冢子大
琰前明經調拔萃以地勢嫌抑次子大璟河南府叅軍
幼曰瓚未仕大琰大璟等咨於叔父與伯季竭誠信以
明年正月日祔葬於東都穀水之陽先封禮也惟公早
精六學尤邃三禮晚節究觀厯代史端誠正議宏達卓
越厯於大朝名致直言秉剛履險不疚不跲熒熒然有
史鮪汝黯之遺風序賓樹善銳於簡拔同升諸公者十
一人並列於藩者若干人喜士睦親造次以之用之不

求備求之如已失洪範之攸好德大雅之人鮮克舉惟
公有焉某建中末與公同爲丹陽公從事中歲左戶請
爲郎及茲建牙壤地相接周旋出入殆四十年今聖朝
多士如林永懷舊故凋落向盡保衡又沒可勝慟耶公
之記室大理評事羅立言狀公之行將諸無容之請牽
課鄙億詞達而不文銘曰

盧公懿懿戴仁抱義其用不器迺簡在庭大猷是經穆
然儀形再貳六職兩居方國人用景式溟波卿雲天矯
輪困奮其翼鱗物情未直壽寵未極生死糾纏洛師舊
鄉穀水之陽先人所藏孝子悌弟乾肝焦肺寧此後載

刻飾龜螭發揚聲詩傳信在茲

書圖化開

kuahua library

權載之文集卷第十三

化國書館

karhna library

開化圖書館

Kaishua library

開化圖書館

Kaichua library

學

開化圖書館

Kaishwa Library

開化圖書館

Washua Library

Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17
1 2 3 4 5 6 7




權載之文集
二

開化圖書館
Kankwa library

開化圖書

Washua Library



TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color